

Ikalaata ilya kwanda ilya Paulo ku Bhakolinso Uwandilo

Umusundikwa uPaulo asimbile ikalaata ili ku Bhakilisiti abha mu Kolinso, ye yaamile nhaaya imanyisu mu nsi iya Wugiliiki. UPaulo alumbiliye mu nhaaya yiniyo umwanha weeka na meezi umutanda (Mbombo zya Bhasundikwa 18:1-18), abhantu abhinji bhawitishile uYeesu. Heelo uPaulo we asogola mu Kolinso, aBhakilisiti bhakhanda kugabhuhana mu lwitikho. Asimbile ikalaata ili kubhaavwa aBhakilisiti bhaala, inga bhimiile akhinza mu lwitikho.

Mwi kalaata ili, akupanga uwubhiibhi uwa kugabhuhana aBhakilisiti na kudalinhana ku zya lwitikho mu shibhanza. Akupanga she uMupepu uMufinjile akuutupa ivikunjilwa ivwinji nhaani anzu lugano, lwe lukutwavwa kumupuuta uMulangwa na kubha ni njendo inyinza mu lwitikho. Khabhili akubhakumbusya kuti kunongwa ye uKilisiti azyushile kufuma ku bhafwe, tumanyile kuti nitwe akwinza kutuzusya kubha twe bhuumi winza.

Zye zili mu shitaabu ishi
U Paulo akubhalamukha aBhakolinso na kumupaala uMwungu
Akupanga zye ayimvwizye izya kugabhunhana mu shibhanza
Akubhasokha aBhakilisiti bhe bhali ni njendo izya wubhemu
Imanyizyo ku bhe bhegiine
Imanyizyo izyi njendo zye zikwanziwa kubha nazyo ku bha
Imanyizyo izya she aBhakilisiti bhakwanziwa kwimvwana
Imanyizyo izya kuzyukha kufuma ku bhafwe
U lumbaatikho lwa Paulo ulwa kuviyaatila ivibhanza

Indamukho

¹ Ine ne Paulo, ne uMwungu ambulishiye ku shigane shaakwe imbe ne musundikwa wa Yeesu Kilisiti. Ine peeka na nholo wiitu mu lwitikho uSositeeni, ² tukubhasimbila imwe mubha mu shibhanza sha Mwungu, mwe mali mu nhaaya iya mu Kolinso, mwe uMwungu abhazelfwizye kunongwa ye mupatinhiine nu Yeesu Kilisiti. Mukhabhishilwa kubha mwe bhafinjile bhaakwe,* peeka na bhantu bhonti abhi mbali zyonti bhe bhakumupuuta uYeesu Kilisiti, we wa Mwene waabho, kabhili wa Mwene wiitu.

³ U Taata wiitu uMwungu na Mwene uYeesu Kilisiti bhahalolelaje uwiila, na kubhapa uwutengaanu.

Impaalo zya Paulo kwa Mwungu

⁴ Inkumusalifwa uMwungu waani insiku zyonti kunongwa yiinyu, kunongwa ya wiila waakwe we abhapiye kwi dala ilya Yeesu Kilisiti.

* **1:2** 1:2 Abhafinjile bhaakwe Bhaazya abhafinjile mu Wilulanyo uwa mazwi amajeni.

⁵ Kūnongwa ye mukhomanyiinywe nu Kilisiti, muwaajile uwudumbwe ũwa vwonti, ku mazwi giinyu nu wumanyi wiinyu. ⁶ Kūnongwa ye intumi kũ zya Yeesu Kilisiti zyásimishiziizwe mukaasi yiinyu. ⁷ Ishi mutabhuliliilwe poope ishikunjilwa ngasheeka isha Mupepu uMufinjile, we mukugũulila kugalukha uMwene wiitũ uYeesu Kilisiti. ⁸ ŨMũlungũ akubhagomwa kufishila kũwũmalilishilo inga mutakhabhe ni nongwa isiku liila lye uMwene wiitũ uYeesu Kilisiti akhayinza kũlonga abhantũ. ⁹ ŨMũlungũ musunde, ũweene ábhabhilishiiye imwe mũbhe nũ wũpeeka nũ Mwana waakwe uYeesu Kilisiti, uMwene wiitũ.

Kuviitana mũ shibhanza

¹⁰ Bhanholo bhaani mũ lwitikho, inkubhasokha kwi taawa lya Mwene wiitũ uYeesu Kilisiti, mwimvwanaje mwenti ku lyolyonti lye mukũlonga. Kũtakhabhe kuzilana, lyoli mũbhe nũ mwoyo weeka ni nsibho yeeka. ¹¹ Bhanholo bhaani, abhantũ bhamu abha mu nyumba iya Kulowe bhambuziizye kuti mutakwimvwana. ¹² Ishi, zye inkwanza kũlonga zye zi ziizi: weeka weeka mukaasi yiinyu akũlonga izyakwe, ũmo akuti, “Ine ne wa Paulo.” Ũwamwabho akuti, “Ine ne wa Apoolo.” Ũwamwabho akuti, “Ine ne wa Keefa.”† Ũwamwabho akuti, “Ine ne wa Kilisiti.” ¹³ Bhũli! UKilisiti agabhunhiine? Bhũli, uPaulo

† **1:12** 1:12 ŨKeefa Ili litaawa lyamwabho ilya Peeteli. Itaawa Peeteli ndongo ya Shiyunaanani, itaawa Keefa ndongo ya Shialamayiki. Mũ ndongo ziniizi kwe kuti Lyalaawe. Bhaazya Mataayi 16:18.

we áfuuye pa shikhobhenhanyo kúnongwa yiinyu? Bhali, mwózeliilwe kwi taawa lya Paulo?

¹⁴ Inkumusalifwa uMlungu, kúnongwa ye intámwoziize umuntu kukwinyu, lyoli uKilisipo na Gaayo. ¹⁵ Pe shiniisho, ataliipo we angakhola kulonga kuti áyozeliwe kwi taawa lyani. ¹⁶ Khabhili nábhóziize abhantu abha mu nyumba ya Siteefana. Bhanaabho bheene bhe nábhóziize, intamanyile kuti námwoziize umuntu uwamwabho wowonti. ¹⁷ Kwe kuti, uKilisiti atánsonteleziize kwozya abhantu. Ánsonteleziize kuvwinsya iNtumi iNyinza, sita kusubhila uwumanyi waani uwa kulonga akhinza, inga uwufwe wa Kilisiti pa shikhobhenhanyo watakhabhe sita makha.

Uwumanyi wa Mlungu

¹⁸ Kwe kuti intumi izya wufwe wa Kilisiti pa shikhobhenhanyo ku bhe bhakuteega bhakulola ngati shilema, lyoli kukwitu twe tukutulwa, intumi ziniizyo makha ga Mlungu. ¹⁹ Kúnongwa ye yisimbiilwe mu Wusimbe uWufinjile kuti, “Inhayinanganya uwumanyi uwa bhe bhali nu wumanyi.

Inhayizikhaana injeele zya bhe bhali ni njeele.”‡

²⁰ Ishi, ali kwoshi we ali ni njeele? Ali kwoshi we mumanyizyi wi ndajizyo? Ali kwoshi we amanyile nhaani kudalikha mu nsiku izi? uMlungu alolesiize apazelu injeele izya mu nsi ini kubha wulema. ²¹ Kwe kuti anza she zili injeele zya Mlungu, abhantu bhatangakhola

‡ 1:19 1:19 Bhaazya Yeesaya 29:14.

kumumanya mu njeele zya bho. Lyoli uMungu ayiganile kubhatwala bhe bhakumwitikha kwi dala ilyi ntumi ye tukulumbiilila. Intumi yiniyo abhantu bhe bhatamumanyile uMungu bhakuti ya shilema. ²² Kunongwa ye aBhayahuudi bhakwanza ivilolesyo, aBhayunaani bhakwanza injeele. ²³ Heelo itwe, tukulumbiilila intumi zya Kilisiti we afuuye pa shikhobhenhanyo. Intumi ziniizo ku Bhayahuudi zikubhaviisya, na ku bhe te Bhayahuudi ntumi zya shilema. ²⁴ Heelo ku bhe uMungu abhabhilishiyeye, aBhayahuudi awe aBhayunaani, uKilisiti makha ga Mungu, kabhili we njeele zya Mungu. ²⁵ Inongwa zye abhantu bhakulola kuti wulema wa Mungu, zyi njeele kushila injeele zya bhantu. Kabhili zye zikulolekha wutolwe wa Mungu, zili na makha kushila amakha aga bhantu.

²⁶ Ishi bhanholo bhaani mu lwitikho, kumbukhaji she mwamile we mukubhilishilwa nu Mungu. Abhinji mukaasi yiinyu bhakhalolekhaga ngati bhatali ni njeele ku nsiibho zya bhantu. Kabhili abhinji mutamile nu waamulo, awe kupaapwa mu nyumba izya bhapiti. ²⁷ uMungu abhasebhile abhantu bhe mu nsi bhakulolekha bhalema, inga abhasupizye abhi njeele. Kabhili uMungu abhasebhile abhantu bhe bhakulolekha mu nsi bhatolwe, inga abhasupizye abha makha. ²⁸ uMungu abhasebhile abhantu abhapiina mu nsi, bhe bhakushoolanywa, bhe bhakulolekha ngati te bhantu, inga abhiisye ulushindikho abha lushindikho. ²⁹ Abhombile shiniisho

inga umuntu wowonti aleshe kuyibaada pamiiso ga Mūlungu. ³⁰ Kwe kuti uMūlungu we abhapatinhanyiinye nu Yeesu Kilisiti. Uweene amubhiishile uYeesu Kilisiti kubha njeele zyita, wunuyoyu uKilisiti we akuutupa uwugolosu, uwufinjile, na wātūlwe. ³¹ Anza she yisimbilwe mu Wusimbe uWufinjile kuti, “Umuntu wowonti we akuyibaada, ayibaadaje kunongwa iya zye uMwene abhombile.”§

2

Kulumbilila intumi zya Yeesu Kilisiti

¹ Bhanholo bhaani mu lwitikho, we ninza kukwinyu kulumbilila intumi zya Mūlungu, intakhalumbililaga inga indoleshe kuti imanyile kulonga akhinza, awe kuti indi ni njeele nhaani. ² Násibhiliye kuti intalonje akhantu akhanji kukwinyu, lyoli kulonga intumi zya Yeesu Kilisiti, na kufwa kwakwe pa shikhobhenhanyo. ³ We indi kukwinyu, náamile ne mutolwe, náamile ni lyoga, kabhili inhayingaga nhaani. ⁴ Akhabhalilo khe inhabhamanyizyaga na kulumbilila, intakhalongaga amazwi kuti mwitische kunongwa yi njeele yaani, lyoli makha ga Mupepu uMufinjile gakhalolesyaga uwanalyoli. ⁵ Inhabhombaga liniilyo, kuti ulwitikho lwinyu latusubhilaje insibho zya bhantu, lyoli lubhe mu makha ga Mūlungu.

Injeele kufuma kwa Mupepu uMufinjile

§ **1:31** 1:31 Bhaazya Yelemiya 9:23-24.

⁶ Heelo tukumanyizya ku njele ku bhantu bhe bhagomile mu lwitikho, ileelo injele yiniyo te ya mu nsi ini, awe te ya bhapiti abha mu nsi ini bhe kumalilishilo bhakhayiyaga. ⁷ Itwe tukumanyizya izyi nsibho ya Mulungu, zye zya kukwilu, kabhili zye zyafisishile. Umulungu abhatishile insibho yiniyo we ashili kupela insi kunongwa ya wumwamu wiitu. ⁸ Ataliipo poope weeka mu bhapiti abha mu nsi ini we amanyile injele yiniyo. Kunongwa ye inga bhamanyaje nhani bhatamukhomeleeye uMwene uwa wumwamu. ⁹ Anza she yisimbilwe mu Wusimbe uWufinjile kuti,
 “Inongwa zye umuntu atalinjile kulola,
 poope kuzyimvwa,
 zye umuntu atalinjile poope kuzibhikha
 mu mwoyo waakwe,
 ziniizyo zye uMulungu abhalinganizanyiine
 bhe bhamuganile.”*

¹⁰ Heelo itwe uMulungu atugubuliye inongwa ziniizi kushilila kwa Mupepu uMufinjile. Kunongwa ye uMupepu uMufinjile akulola zyonti, poope zye zili kukwilu mwa Mulungu. ¹¹ Ataliipo umuntu we angakhola kumanya zye uwunji akusibha, lyoli zikumanyikha mu mwoyo wa wuula we akusibha mwene. She shiniisho, ataliipo we azimanyile zye uMulungu akusibha, lyoli uMupepu wa Mulungu. ¹² Ishi itwe, tutaposhelweye umupepu uwa mu nsi umu, lyoli uMupepu we akufuma kwa Mulungu,

* 2:9 2:9 Bhaazya Yeesaya 64:4.

inga atumanyizyaje zye uMlungu atupiiye pabhulo.

13 Pe shiniisho, tutakulonga amazwi ge tumanyiiye ku njele ya bhantu, lyoli mazwi ge uMupepu uMufinjile atumanyiziize. Tukwilulanya inongwa izya Mupepu ku bhe bhali nu Mupepu wunayo. 14 Pe umuntu we atali nu Mupepu uMufinjile, atangakhola kuposheela zye zikufuma kwa Mupepu wunayo. Kukwakwe ziniizyo zya shilema, khabhili atangakhola kuziyaganya, kunongwa ye umuntu akuziyaganya ziniizyo ku makha ga Mupepu. 15 Lyoli umuntu we akulongolwa nu Mupepu uMufinjile, wunayo akuziyaganya zyonti. Heelo abhantu abhanji bhatangamwaganya uweene. 16 UWusimbe uWufinjile wakuti,

“Wu naanu we azimanyile insiibho zya Mwene? Wu naanu we angamupanzya?”†

Heelo itwe tuli ni nsiibho zye zikufuma kwa Kilisiti.

3

Ataliipo uwa kuyipaala mu mbombo ya Mlungu

1 Bhanholo bhaani mu lwikho, we namile kukwinyu intakhalongaga nimwe ngati bhantu bhe bhakulongolwa nu Mupepu uMufinjile, lyoli inhalongaga nimwe ngati bhantu bhe bhakulongolwa ni nsungukho izya mu nsi,

† 2:16 2:16 Bhaazya Yeesaya 40:13.

khabhili anza bhaana abheela kumwitikha uK-
 ilisiti. ² Nábhamwensiizye izibha, te shaakulya
 ishigomu kunongwa ye mwáshili kugoma.
 Poope niishi mutangashikhola, ³ kunongwa ye
 niishi bhũlo muli ni njendo izya mu nsi.
 Bhũli, umwone ni bho mukaasi yiinyu vwe
 mukujendelela navwo, viniivwo vitakulolesya
 kuti niishi bhũlo mukulongolwa ni nsungukho
 izya mubhili na kubha ni njendo izya mu
 nsi? ⁴ Inkulonga liniilyo kunongwa ye weeka
 akulonga kuti, “Ine ne wa Paulo.” Uwamwabho
 akuti, “Ine ne wa Apoolo.” Bhũli, ziniizyo
 zitakulolesya kuti, muli she mukubhomba ngati
 bhantu bhe bhatakumwitikha uMũlungu?

⁵ Ishi uApoolo wu naanu? Wooke uPaulo
 wu naanu? Itwe twe bhabhombi twe
 uMũlungu atusonteleziizye kubhaavwa imwe
 kumwitikha. Anza she weeka weeka wiitu
 apewiilwe na Mũlungu. ⁶ Ine náwaalile imbeyu,
 uApoolo akhitiilila aminzi, ileelo uMũlungu we
 akuyimezya na kuyikuzya. ⁷ Ishi we akuwaala
 te wa kumusubhila awe we akwitiilila, lyoli
 uMũlungu we akumezya na kukuzya imbeyu
 we wa kusubhilwa. ⁸ We akuwaala na
 we akwitiilila bhonti bhalingaanile, ileelo
 weeka weeka uMũlungu akhayimuposheeleya
 kufumilana na kuyikungula pa mbombo
 yaakwe. ⁹ Kwe kuti itwe twe bhabhomba
 mbombo bha Mũlungu, niimwe mwe shiizi
 sha Mũlungu, khabhili mwe nyumba yaakwe.

¹⁰ Ku wiila wa Mũlungu we ampriye, inzenjile
 ulwalo anzu muzenji umwinza, uwi njeele, ishi
 umuntu uwamwabho akuzenga pamwanya pa

lwalo lunuulwo. Ileelo weeka weeka abhe amiso, she akuzenga pamwanya pa lwalo lunuulwo.

¹¹ Ataliipo umuntu we angakhola kuzenga ulwalo ulunji, lyoli luula lwe luzenjiilwe, kwe kuti uYeesu Kilisiti. ¹² Ileelo pamwanya pa lwalo lunuulwo, umuntu angakhola kuzenga ku zahaabu, ku vijela, awe ku mawe agi nhela impiti, khabhili angakhola kuzenga ku makwi, ku matunda, na ku malaala. ¹³ Ileelo imbombo iya muntu wowonti yikhayilolekha kuti yili bhuliibhuli, kunongwa ye isiku liila iya kulongwa likhayiyibhikha apazelu imbombo yaakwe. Kwe kuti imbombo iya wowonti yikhayilingwa uwinza waakwe ku mwoto uwa kulongwa. ¹⁴ Inga khe umuntu azenjile pa lwalo lunuulwo khatalungulila, umuntu wanuuyo akhayiposheela. ¹⁵ Lyoli inga imbombo ya muntu yalungulila, te akhaposheele, ileelo uweene wuuyo akhayituulwa, lyoli akhayibha ngati muntu we aapona mu mwoto.

¹⁶ Bhuli, mutamanyile kuti imwe mwe Nyumba iMfinjile, khabhili uMupepu wa Mulungu akwikhala mukaasi yiinyu? ¹⁷ Inga umuntu ananganya iNyumba iMfinjile ya Mulungu, uMulungu akhayimnanganya umuntu wanuuyo. Kunongwa ye inyumba ya Mulungu mfinjile, inyumba yiniyo mwe mwemwe.

¹⁸ Umuntu wowonti mukaasi yiinyu atakhayikhopele kuti ali ni njeele. Umuntu inga akuyilola kuti ali ni njeele mu nsi umu, ayibhishhe mulema inga azyaje injeele izya nalyoli. ¹⁹ Kunongwa ye injeele izya mu

nsi, walema pamiiso ga Mulungu. Anza she yisimbiilwe mu Wusimbe uWufinjile kuti, “UMulungu akubhalema abhi njele mu wushevu waabho.”* ²⁰ Khabhili yisimbiilwe mu Wusimbe uWufinjile kuti, “UMwene azimanyile insiibho izya bhi njele kuti zitakhondeeye.”†

²¹ Pe umuntu wowonti atakhayibaade kunongwa iya bhantu. Kunongwa ye ivintu vwonti vwinyu. ²² Abhe wu Paulo, awe wu Apoolo, awe wu Keefa, awe vibhe vwa mu nsi, awe uwuumi, awe uwufwe, awe vve viliipo ishi, awe vve vikhayibha, vwonti vwinyu. ²³ fleelo imwe, mwe bhantu bha Kilisiti, woope uKilisiti wa Mulungu.

4

Imbombo zya bhasundikwa

¹ Pe abhantu bhatubhaazye kuti itwe twe bhabhombi bha Kilisiti. Khabhili tupewiilwe imbombo iya kubhalumbiilila abhantu intumi zya Mulungu zye zyafisishile. ² Ishi, wowonti we apewiilwe imbombo, akhondeeye abhe musunde. ³ fleelo kukwani ine, intakusaajila inga nalongwa niimwe, awe kulongwa na bhalonganyi abha mu nsi. Khabhili ine intakuyilonga nuneene, ⁴ kunongwa ye intakulongwa lyolyonti mu mwoyo waani. fleelo liniilyo litakumbiikha imbe sita wubhiibhi, uMwene we akundonga. ⁵ Pe shiniisho, mutabhalongaje abhantu we khashili kufikha

* **3:19** 3:19 Bhaazya Ayuubu 5:12-13. † **3:20** 3:20 Bhaazya Zabuuli 94:11.

akhabhalilo khaakwe, lyoli muguulile kufishila pi siku lye uMwene akhayinza. Uweene we akhayivundula zyonti zye zifisishile mu khiisi, na kulolesya apazelu zye zili mu mooyo ga bhantu. Pe umuntu wowonti akhayiposheela impaalo ye yimukhondeeye kufuma kwa Mulungu.

⁶ Ishi, bhanholo bhaani mu lwitiko, amazwi gonti ganaago ge nalonga ku zya Apoolo na ku zyani, shikholanyo kukwinyu. Kufumilana ni shikholanyo shaani ni sha Apoolo, inkwanza kuti mumanye indonjelo ye yikuti, "Zilemaje zye zisimbiilwe mu Wusimbe uWufinjile nyeene." Atakhabhe umuntu pakaasi yiinyu we akuyibaadila umuntu weeka na kumushoolanya uwunji. ⁷ Wu naanu we akubhiishile kuti ukhondeeye kushila uwunji? Khantu khooni khe uli nakho khe utapewiilwe na Mulungu? Khabhili inga wapewiilwe, khooni khe ukuyibaadila ngati utapewiilwe?

⁸ Ishi mukuyilola kuti mwikutile! Mwabha mwe bhadumbwe! Mwabha mwe bhamwene sita twetwe! Kwashi inga mubhanje nalyoli mwe bhamwene, kuti nitwe tutabhaale peeka nimwe! ⁹ Kwe kuti itwe tubhasundikwa, uMulungu atubhiishile kubha bhantu bha kushoolanywa. Ngati bhantu bhe bhalongiilwe kugogwa, kunongwa ye tubhishiilwe palukindi lwa bhantu bhonti, pilongolela pa bhakhabhizya na pa bhantu. ¹⁰ Itwe tukulolekha twe bhalema, kunongwa ye tukumubhombela uKilisiti, ileelo imwe mukuyilola mwe bhi njeele kunongwa ye mupatinhanyiinywe nu

Kilisiti. Itwe tukulolekha twe bhatolwe, ileelo imwe mukuyilola muli na makha. Itwe bhakutashoolanya, ileelo imwe mukuyilola mwe bha lushindikho. ¹¹ Poope akhabhalilo ikha, tali ni nzala ni shumilwa, tulaliliilwe. Tukukhomwa, kabhili tutali nu wiikhalo. ¹² Tukuyikungula kubhomba imbombo ni nyoobhe zyitu taneetwe. We abhantu bhakutuliga, tukubhasaya, we bhakutuyimvwa, tukujimbiilila, ¹³ we bhakutwandila amalenga, tukubhaamula ku wutonsu. Poope niishi, tukulolekha ngati wukhandamanu uwa mu nsi, kabhili kwa muntu wowonti itwe twe maswaswa.

¹⁴ Intakubhasimbila amazwi ganaaga inga imbasupizye, lyoli inkwanza kubhasokha mubhaana bhaani abhaganwa. ¹⁵ Poope she muli na bhamanyizi ielufu ishumi mwa Yeesu Kilisiti, ileelo mutali na bhayise abhinji. Ine ne yise wiinyu kwi dala ilya kupatinhanywa nu Kilisiti, nabhapaapile kwi dala ilya kulumbiilila iNtumi iNyinza kukwinyu. ¹⁶ Pe shiniisho, inkubhalamba mwenyezyaje kukwani. ¹⁷ Kanongwa iya kubhaavwa, imusonteleziizye uTiimoti, umwana waani umuganwa mu lwitikho, we musunde mu mbombo ya Mwene. Uweene atibhakumbusyaje she inkumalandata uKilisiti, na zye inkumanyizya poponti mu vibhanza vwonti.

¹⁸ Bhamu mukaasi yiinyu bhali na mabaado, bhakusiibha kuti te inhinze winza kukwinyu. ¹⁹ Ileelo inga uMwene ayigana, inkusubhila kwinza kukwinyu nalubhilo. Panaapo pe

inhayimanya amazwi ge bhakulonga bhanaabho bhe bhakuyibaada, te kumanya amazwi ganaago meene, lyoli kumanya na makha gaabho mu lwitikho. ²⁰ Kwe kuti uwumwene wa Mulungu,* wutali mu mazwi, lyoli mu makha gaakwe. ²¹ Ishi, mukwanza imbombe lyoni? Ininze kukwinyu ni ndiisa? Awe ininze na mwoyo uwa lugano nu wutonsu?

5

Uwubhembu wutakwanziwa mu shibhanza

¹ Inongwa zivwinshile kuti, kukwinyu kuli uwubhembu. Uwubhembu we wutafumiye naalumo poope ku bhe bhatakumwitikha uMulungu. Inimvwizye kuti umuntu akubhembukha na mushi wa yise waakwe. ² Niimwe mukuyibaada! Mutakuswimiilila na kumwefwa umuntu we akubhomba ziniizyo mukaasi yinyu! ³ Ine she poope indi ukutali niimwe, umwoyo waani wuli peeka niimwe. Khabhili ine imulonjile umuntu we abhombile liniilyo, anza she nhani nabhomba bhanje indi kunukwo. ⁴ Akhabhalilo khe mukubhangaana kwi taawa lya Mwene witu uYeesu Kilisiti, umwoyo waani wukubha peeka niimwe, peeka na makha ga Mwene witu uYeesu. ⁵ Pe mumuleshe umuntu wanuuyo kwa Seetani, inga uwuntu waakwe uwi mbiibhi wufundwe, pe umwoyo waakwe wukhatulwe pi siku ilya kugalukha uMwene uYeesu.

* **4:20** 4:20 Uwumwene wa Mulungu Bhaazya mu Wilulanyo uwa mazwi amajeni.

6 Amabaado giinyu gatakhondeeye. Bhuli, mutamanyile kuti uwusafu wushe bhulo, wakusafwa ishinyenya shonti? 7 Pe muyizelufwe, mwefwe uwusafu uwa khali, inga mubhe ngati shinyenya ishipwa she shitali nu wusafu. Nalyoli imwe she muli, kunongwa ye uMlungu amufumwizye uKilisiti kubha mfinjile ngati Nyaana yi Ngoole iyi Pasaaka,* inga atutule. 8 Pe shiniisho, tuleshe kushimwa iPasaaka ku wusafu uwi maandi, kwe kuti uwubhiibhi ni mbiibhi. Lyoli tushimwaje ku makaati ge gatali nu wusafu,† we mwoyo umuzelu nu wa nalyoli.

9 Mwi kalaata lye nabhasimbiiye, nabhabhuziizye kuti, muleshe kubha nu wapeeka na bhabhembu. 10 Te kuti muleshe kubha nu wapeeka nziila na bhabhembu abha mu nsi umu, awe abhanavigane, abhabuda, na bhe bhakupuuta ivifwani vwa bhamlungu. Kunongwa ye kubhomba shiniisho mwakhondeeye kusaama mu nsi umu. 11 Lyoli nabhasimbiiye kuti: muleshe kubha nu wapeeka nu muntu we akuyitekha kuti nholo mu lwitikho, ileelo mubhembu, awe wu navigane, awe akupuuta ivifwani iwwa

* 5:7 5:7 INyaana yi Ngoole iyi Pasaaka ABhaisilaeli we bhashili kusogola ku Miisili bhabhoolile ingoole. Ihanda lyakwe bhakhapakha mu nyiji inga ukhabhizya wa Mlungu we akushila kubhagoga abhalekhaje. Bhaazya Kufuma 12:21-23. UYeesu akukholanywa ni nyaana yi ngoole yiniyo. Bhaazya iNyaana yi Ngoole iwinza iPasaaka mu Wilulanyo uwa mazwi amajeni. † 5:8 5:8 Bhaazya Kufuma 12:3-20; Nkumbushizyo 16:3.

bhamulungu, awe mulumanya, awe mumwezi, awe mubuda. Umuntu anza wamwabo, matakhasheele poope kulya nawo.

¹² Bheli, mbombo yaani kubhalonga bhe bhatitishile? Bheli imwe matakhondeeye kubhalonga bhe bhali mu shibhanza?

¹³ Bhanaabho bhe bhatitishile uMulungu wamwabo we akhayibhalonga. Anza she uWusimbe uWufinjile wakuti, “Imwe namubhinje amubhomba mbiibhi pakaasi yiinyu.”‡

6

Kusitaakana aBhakilisiti

¹ Inga weeka mukaasi yiinyu alumiine nu wamwabho we ayitishile, khooni khe akusitaaka ku bhe bhatitishile? Bheli, atakhondeeye kusitaaka ku bhamwabho bhe bhitishile kuti bhabhimvwanze? ² Mutamanyile kuti bhe bhitishile bhe bhakhayiyilonga insi? Ishi, inga imwe mukhayiyilonga insi, matakhondeeye kulonganya inongwa inyinsi nyinsi mukaasi yiinyu? ³ Bheli, mutamanyile kuti tukhayibhalonga abhakhabhizya? Inga tukhayibhalonga abhakhabhizya, tukhondeeye kulonganya inongwa inyinsi nyinsi izyi nsiku zyonti. ⁴ Ishi, khooni we mulumiine mukutwala inongwa zyinyu ku bhantu bhe ishishanza shitakubhashindikha kubha bhalonganyi bhi nongwa? ⁵ Inkulonga shiniisho inga mulole insoni. Ishi, pakaasi yiinyu ataliipo uwi njeele ngaweeka we angakhola kubhimvwanza

‡ 5:13 5:13 Bhaazyu Nkumbushizyo 17:7; 19:19; 21:21; 24:7.

bhe bhalumiine? ⁶ Heelo imwe, umuntu akumusitaaka uwamwabho we ayitishile, khabhili ku bhalonganyi bhe bhatitishile!

⁷ Kusitaakana kunukwo kukulolesya kuti mutoliilwe nziila! Bhuli, te kwashi kumulekha umuntu akubhombela akhabhiibhi? Bhuli, te kwashi kwitikha kufwulilwa ishuma shiinyu?

⁸ Heelo ishi imwe, mwe mukubhombela akhabhiibhi abhantu na kufwala ishuma shaabho, khabhili mukubhomba shiniisho ku bhamwinyu bhe bhitishile! ⁹ Mutamanyile kuti abhabhomba mbiibhi te bhakhinjile mu wamwene wa Mulungu?

Mutayikhopelaje! Abhantu bhe bhakubhomba uwelengani, bhe bhakupuuta ivifwani vwa bhamulungu, abhabhembu, awe bhe bhakubhembukha abhasakhaala ku bhasakhaala, ¹⁰ abhiibha, abhanavigane, abhamwezi, abhi ndigo, na bhabuda, bhanaabho bhonti te bhakhinjile mu wamwene wa Mulungu. ¹¹ Bhamu mukaasi yiinyu she mwamile. Heelo ishi mwe bhazelufwe, mwabha mwe bhafinjile, na kubha mwe bhagolosu kwi taawa lya Mwene wiitu uYeesu Kilisiti, na mwa Mupepu wa Mulungu wiitu.

Kulekha uwubhembu

¹² Bhamu mukaasi yiinyu bhakuti, "Ivintu vwonti vwitishiliilwe kukwani." Heelo te kuti ivintu vwonti vikhondeeye. Inkwitikha kuti ivintu vwonti vwitishiliilwe kukwani, ileelo intangakhola kubha ne mutumwa wa khantu khokhonti. ¹³ Bhamu bhakuti, "Iwakulya vilipo kunongwa ya lwanda, lwope

ulwanda luliipo kunongwa yi shaakulya.” Ileelo uMwungu akhayiviyazya vwonti vibhili. Umabhili wa muntu wutapeliilwe kunongwa ya kubhomba uwubhembu, lyoli wapeliilwe kunongwa iya kumabhombela uMwene, wope uMwene we akusunga umabhili. ¹⁴ Umwungu amuzusyizeye uMwene uYeesu kufuma ku wufwe, akhayituzusya niitwe ku makha gaakwe.

¹⁵ Mutamanyile kuti amabhili giinyu mpaaswa ma mabhili wa Kilisiti? Bhuli, ungakhola kwega impaaswa zya mabhili wa Kilisiti na kubhikha kubha mabhili weeka nu mubhembu? Ndaali, she zitangabha! ¹⁶ Umuntu wowonti we akubhembukha nu mubhembu akubha mabhili weeka nawo. Kunongwa ye yisimbiilwe mu Wusimbe uWufinjile kuti, “Bhabhili bhanaabho bhakubha mabhili weeka.”* ¹⁷ Ileelo umuntu wowonti we akhomanyiinywe peeka na Mwene, atibhe unwoyo weeka nawo.

¹⁸ Muyefwaje nu wubhembu. Imbiibhi izinji zyonti, umuntu akubhomba kunzi ya mabhili waakwe, ileelo umuntu we akubhembukha, akubhombela imbiibhi umabhili waakwe. ¹⁹ Bhuli, mutamanyile kuti, amabhili giinyu nyumba ya Mupepu uMufinjile we ali mukaasi yiinyu, we uMwungu abhapiiye? Amabhili te shuma shiinyu, ²⁰ kunongwa ye mwatuliilwe ku wupala uwupiti. Shiniisho mumupaalaje uMwungu ma mabhili giinyu.

* **6:16** 6:16 Bhaazya Wandilo 2:24.

7

Insoshi ku zya bhe bhegiine

¹ Ishi, inkubhaamula ku ziila zye mwánsimbiiye. Khinza umusakhaala kwikhala sita kwegá. ² Heelo kunongwa iya kuyeeftwa mu ndingo izya wubhembu, umusakhaala abhanje nu mushi waakwe wuuyo, wope umwantanda abhanje nu mulume waakwe wuuyo. ³ Umulume akwilizyaje kwa mushi waakwe izya kwegana, wope umushi akwilizyaje kwa mulume waakwe ku zya kwegana. ⁴ Umushi atali nu waamulo ku zya mubhili waakwe, lyoli umulume waakwe. Wope umulume atali nu waamulo ku zya mubhili waakwe, lyoli umushi waakwe. ⁵ Mutimanaje, lyoli inga mwitinhiine kulekha ku khabhalilo khashe bhulo kuti mupuute kwa Mulungu. Pilogolela, mugalushilane winza, kuti uSeetani atakhabhalinje ku wubhembu we mwatolwa kuyidinda.

⁶ Inkulonga amazwi ganaago kunongwa ya kubhasunda, te kubhabijila. ⁷ Bhanje shigane shaani, naayiganile kuti abhantu bhonti bhabhe anziine.* Heelo umuntu weeka weeka umulungu amupiiye ishikunjilwa shaakwe, weeka ishikunjilwa ishi, uwamwabho isho.

⁸ Ishi, inkubhabhuuzya bhe bhashiili kwegana na bhafwile, kuti yaamile khinza bhasyale shiniisho anza she ine indi. ⁹ Heelo inga bhakupootwa kujimba, bheegaje, awe bhejelwaje kunongwa ye

* **7:7** 7:7 Bhabhe anziine Ipa uPaulo akhayimanyisyaga kuti ateejile, khabhili shiniisho sháamile shikunjilwa shaakwe.

kwashi kubhomba shiniisho na kuti uyimbaje ni nsungakho iya mubhili.

¹⁰ Ku bhe bhegiine inkubhalajizya kuti umushi atamulekhaje umulume waakwe, indajizyo yiniini te yaani, lyoli ya Mwene uYeesu.†

¹¹ Heelo inga alekhana nawo, ategwaje ukunji, inga te shiniisho, ayimwane nu mulume waakwe, na kugalushilana. Wope umulume, atakhamuleshe umushi waakwe.

¹² Ku bhantu abhanji inkubhabhuzya, ziniizi zyi nkalonga nsibho zyani te zya Mwene: kuti umusakhaala we ayitishile inga ayeejile umushi we atitishile, nu mushi wunuyo ayitikha kwikhala nawo, atakhamuleshe.

¹³ Wope unwantanda we ayitishile, inga ayejeliilwe nu mulume we atitishile, nu musakhaala wunuyo ayitikha kwikhala nawo, atamulekhaje.

¹⁴ Kunongwa ye uMlungu akumuzelufwa umulume we atitishile, kwi dala ilya mushi waakwe. Wope umushi we atitishile, uMlungu akumuzelufwa kwi dala ilya mulume waakwe. Bhanje zitali shiniisho, nhani abhaana bhiinyu bhakhandamanu, lyoli ishi bhaana bha Mlungu.

¹⁵ Heelo inga we atitishile akwanza kulekhana na we ayitishile, muleshe abhombe shiniisho. Ipo uMukilisiti wunuyo atakudindwa mu weegi wunuwu. Kunongwa ye uMlungu abhabhishiiye kuti mwikhalaje ku wutengaanu.

¹⁶ Kwe kuti utangamanya kuti umulume waakho angitikha kunongwa ya lwitikho lwakho. Niwe

† **7:10** 7:10 Bhaazya Mataayi 19:3-9; Maalika 10:2-12.

wumusakhaala we uyitishile, utangamanya kuti umushi waakho angitikha kunongwa ya lwitikho lwakho.

Uwikhalo we uMlungu alajiziye

¹⁷ Umuntu wowonti ayikhalaje anzu Mwene she amugabhiiye, khabhili abhe anza she uMlungu amubhilishiiye. Liniili lye ndajizyo yaani ku vibhanza vwonti. ¹⁸ Bhuli! Umuntu inga abhilishiliilwe we atahiliwe,‡ aleshe kuyibhikha ngati atahiliwe. Khabhili umuntu inga abhilishilwa we ashili kutahiiliwa, atakhatahiiliwe. ¹⁹ Kutahiiliwa awe sita kutahiiliwa, kutali nu winza, lyoli lye linya ku kulema indajizyo zya Mlungu.

²⁰ Shiniisho, umuntu wowonti abhe anza she amile we uMlungu akhamubhilishilaga. § ²¹ Bhuli! uMlungu akubhilishiiye we uli mu wutumwa? Utakhawusaajile wunuwu. Ileelo inga walyaga idala ilya kubha mu wasatulwe, jenda idala liniilyo. ²² Kunongwa ye umuntu we amile mutumwa we akubhilishilwa nu Mwene, wunuyo akubha musatulwe kwa Mwene. Woope we amile musatulwe we akubhilishilwa nu Mwene, wunuyo akubha

‡ **7:18** 7:18 Atahiliwe Ku Bhayahuudi inga umwana umusakhaala apaapwa, isiku ilya naane kufuma apaapwe bhakhabhoolaga ingoola iya mubhili kumwanya ku wasakhaala kulolesya ulufingo lwa Mlungu lwe abhiishile nu Abulahaamu peeka ni shipaafi shaakwe shonti. Bhaazyu kutahiili mu Wilulanyo uwa mazwi amajeni. § **7:20** 7:20 Shiniisho, umuntu wowonti abhe anza she amile we uMlungu akhamubhilishilaga Amazwi iga ku kuti umuntu abhe anza she uMlungu akwanza.

mutumwa wa Kilisiti. ²³ Mwátuliilwe ku wupala uwupiti, pe shiniisho mutabhanje mwe bhatumwa bha bhantu. ²⁴ Bhanholo bhaani mu lwitikho, umuntu wowonti anza she uMwungu amubhilishiye, ayikhalaje anza she abhilishililwe.

Insoshi ku bhe bhatejililwe na bhafwile

²⁵ Ishi, ku bhalindu bhe bhatajendile na bhasakhaala, intali ni ndajizyo kufuma kwa Mwene. fleelo inkubhabhuzya ku nsibho zyani ine ne ku shisa sha Mwungu inhondeeye kusubhilwa. ²⁶ Kunongwa ye kuli amayimba akhabhalilo ikha, inkulola kuti khinza umuntu ayikhale anza she ali. ²⁷ Bhuli, uyejilwe? Utanzaje kutabhukha. Bhuli, uteejile? Utanzaje kwegu. ²⁸ fleelo inga weega, utabhombile mbiibhi, umulindu wope inga ayeejelwa, atabhombile mbiibhi. fleelo, bhanaabho inga bheegana bhakhayibha na mayimba aga mu nsi. Niine injiganile kuti ziniizyo zitakhabhaaje imwe.

²⁹ Bhanholo bhaani mu lwitikho, inkulonga shiniishi kuti, akhabhalilo khe khasyalile khali khashe kuti uKilisiti agalushe. Kufuma akhabhalilo ikha bhe bheejile bhaleshe kusibha abhashi bheene. ³⁰ Bhoope bhe bhakulila, bhabhe ngati bhatakulila, bhe bhakuseshela bhabhe ngati bhatakuseshela, bhe bhakukala bhabhe ngati bhatali ni vintu. ³¹ Khabhili bhe bhakuyiyimvwa ni vintu ivwa mu nsi umu, bhabhe ngati bhatakuyiyimvwa navwo, kwe kuti ivwa mu nsi vikushila.

³² fleelo inkwanza kuti muleshe kuyiyimvwa ku zya mu nsi. Umuntu we ateejile, akuyifumwa

kubhomba imbombo ya Mwene, akusiibha she angamukhondezya uMwene. ³³ Lyoli umuntu we ayeejile, akuyifumwa kubhomba izya mu nsi, akusiibha she angamukhondezya umushi waakwe. ³⁴ Insiibho zyakwe zigabhunhiine pabhili. Umwantanda we atali nu mulume, nu mulindu we atejeliilwe bhakuyifumwa kubhomba imbombo ya Mwene inga bhabhe bhafinjile amabhili nu mwoyo. Heelo umwantanda we ali nu mulume, akuyifumwa kubhomba izya mu nsi, akusiibha she angamukhondezya umulume waakwe. ³⁵ Amazwi ganaaga ge inkubhabhuzya te kuti inkwanza kubhadinda, lyoli inkwanza kubhaavwa. Inkwanza kuti mwikhalaje mwi dala lye likhondeeye, mumabhombelaje uMwene ku mwoyo wonti.

³⁶ Umuntu wowonti we akulola kuti te khinza kamulekha umulindu we amuzinjiiye, khabhili poope she amanha gaakwe aga kwejelwa gashilile, nu muntu wunuyo akulola yikhondeeye bheegane, abhombaje shiniisho. Ipo we atabhombile imbiibhi. ³⁷ Heelo umusakhaala inga ayaamula kuti atakwega sita kubijilwa nu muntu, inga angakhola kuyidinda, khinza atamwegaje umulindu wunuyo. ³⁸ Pe shiniisho, we akwega umulindu akubhomba khinza. Wooke we atakwega, akubhomba

akhinza nhaani.*

³⁹ Khabhili umwantanda we ayejeliilwe, ayikhalaje nu mulume waakwe, akhabhalilo khonti khe umulume waakwe mwumi. Ileelo inga umulume waakwe aafwa, ipo atibhe masatule kwejelwa nu muntu wowonti we amuganile, ileelo umuntu wunwayo abhe mulandati wa Mwene. ⁴⁰ Ileelo kwashi umufwile wunwayo asyale sita kwejelwa. Ziniizyo nsiibho zyani, inkusiibha kuti niine uMupepu wa Mulungu akundongola kulonga amazwi ganaago.

8

Ivintu vwe bhaputiye ku vifwani

¹ Ishi inkulonga ku zya shaakulya she bhafumwizye ku lupuuto ulwa vifwani.* Imanyile mukulonga kuti, "Itwe twenti tuli nu wumanyi." Ileelo uwumanyi wakubhabhikha abhantu kubha na mabaado. Lyoli ulugano

* **7:38** 7:36-38 Kwi dala ilyamwabho amasitaali iga 36-38 gakuti, Umuntu wowonti we akulola atibhe atabhomba khinza kuti atamwitishizye kwejelwa umwali we azinjiliilwe, khabhili inga amanha gaakwe aga kwejelwa gashilile, abhombaje anza she akwanza, abhaleshe bheegane, atibhe atabhombile mbiibhi. Inga umupaafi ayaamula wayo kuti atamwitishizye kwejelwa umwali waakwe, amuleshe anza she ali, atibhe abhombile khinza. Umuntu we akumwitishizya kwegwa umwali waakwe we azinjiliilwe, akabhomba khinza. Ileelo we atakumwitishizya, akabhomba khinza kushila.

* **8:1** 8:1 Ishaakulya she bhafumwizye ku lupuuto ulwa vifwani Mu nsiku ziniizyo, inyama inyinji bhakhatalaga suuti kupuutila ku vifwani vwe bhakhapuutaga ngati wa Mulungu, pilongolela bhakhatwalaga kukazya ku munaalo.

lukubhagomwa abhantu mu lwitikho. ² Inga umuntu akayilola kuti ali nu wumanyi wumo, wanyoyi atali nu wumanyi anza she akwaziwa kumanya. ³ Heelo umuntu we amuganile uMlungu, wanyoyi we amanyishile na Mlungu.

⁴ Ishi ku zya kulya ivwakulya vwe bhafumwizye ku lupuuto ulwa vifwani, tumanyile kuti ivifwani vwa bhamlungu te khantu mu nsi umu. Khabhili tumanyile kuti uMlungu ali weeka mwene. ⁵ Poope inga viliipo ivintu vwe bhakuti bha bhamlungu, yibhe kumwanya, awe paasi, khabhili poope inga bhaliipo abhamlungu abhinji na bhamwene abhinji, ⁶ ileelo kukwitu itwe,

uMlungu ali weeka mwene, we wa Taata,
we apelile ivintu vwonti.

Kunongwa yaakwe itwe tukwikhala.

Khabhili aliipo uMwene weeka mwene, wu Yeesu Kilisiti,
kufumilana na wanyoyi ivintu vwonti
vwapeliilwe,
niitwe twe bhumi kufumilana na wanyoyi.

⁷ Heelo te bhantu bhonti bhe bhali nu wumanyi wunuuwu. Kunongwa ye bhaliipo bhamu bhe bhakubhiye kupuuta ivifwani vwa bhamlungu, niishi bhulo bhali ni nsibho kuti ivifwani vwa bhamlungu khantu kha nalyoli. We bhakulya vwe bhafumwizye ku bhamlungu bhanaabho, vikubhagalasya kusibha kuti bhakupuuta ku bhamlungu abha nalyoli. Kunongwa ye bhatagomile mu lwitikho,

bhakuyilola mu mooyo gaabho kuti shikhandamanu. ⁸ Heelo ishaakulya shitakutubhiikha papiipi na Mulungu. Poope inga twalekha kulya, tutakutezya akhantu, khabhili poope inga twalya, tutakwonjezya akhantu.

⁹ Mubhe amiiso, uwumanyi wiinyu watabhazyaje bhe bhatagomile mu lwitikho bhabhombe imbiibhi. ¹⁰ Kunongwa ye umuntu we atagomile mu lwitikho, inga akulola iwe we ali nu wumanyi ali mu nyumba iya kupuuta ivifwani, ukulya ishaakulya, bhali, mu mwoyo waakwe te asiibhe kuti wope akhondeeye kulya ivwakulya vwe bhafumwizye ku lupuuto ulwa vifwani? ¹¹ Kwi dala liniilyo, uwamwinyu we atagomile mu lwitikho, we uKilisiti amufwiliye, akuteega kufumilana nu wumanyi waakho.

¹² Inga mukubhapvwa abhamwinyu bhe bhatagomile mu lwitikho kwi dala liniilyo, kuti bhagwe mu lwitikho, na kubhavwalazya amooyo gaabho, we mumubhombeeye imbiibhi uKilisiti. ¹³ Pe shiniisho, inga ishaakulya she inkulya, shikumubhiikha uwamwitu agwe mu lwitikho, te indye inyama ngakheeka, inga uwamwitu atakhagwile mu mbiibhi.

9

Kubhaavwa abhabhombi ivwa mubhili

¹ Bhali, ine te ne musatulwe? Bhali, ine te ne musundikwa? Bhali, ine intumulolile uYeesu umwene witu? Bhali, imwe mutamwitishile umwene uYeesu kufumilana ni mbombo zye ine nabhombile? ² Poope inga abhantu bhamu

bhakundola ngati te ne musundikwa, ileelo kukwinyu ine ne musundikwa. Ukwitiko lwinyu kwa Kilisiti, lusimishizyo lwe lukolesya uwusundikwa waani.

³ Abhantu bhe bhakundonga kuti te ne musundikwa, inkubhaamula kuti: ⁴ bhuli, itwe tutakhondeeye kuposheela ivwakulya ni vwakumwela kufumilana ni mbombo yini iya wusundikwa? ⁵ Bhuli, tutakhondeeye kushula na mushi we ayitishile, anza she bhakubhomba uKeefa* na bhasundikwa abhanji, na bhansi bha Mwene uYeesu? ⁶ Awe bhuli, neene numwene na Balinaaba twe tutakhondeeye kuposheela ivintu ivwa kutwavwa kwi dala ilya kubhomba imbombo? ⁷ Musikaali bhuli we akubhala kulwa uwulungu kwi dala ilya kuyisombela wauyo? Mulimi bhuli we atakulya amatunda ge akawaala mu shizi shaakwe isha mazabiibu? Awe mudiimi bhuli we atakumwela izibha kufuma mu vwama vwakwe?

⁸ Bhuli, inkulonga amazwi ganaaga ku nsiibho zya bhantu? Bhuli, indajizyo zya Moose† zitakulonga ziniizyo? ⁹ Kunongwa ye yisimbiilwe mu ndajizyo zya Moose kuti, "Ing'ombe we yikukhanya ingano kupukusula insanga, utayipinyaje kwi lomu."‡§Bhuli, mu mazwi ganaaga kwe kuti uMulungu

* **9:5** 9:5 UKeefa wu Peeteli. † **9:8** 9:8 Indajizyo zya Moose Izi ndajizyo zye uMulungu abhapiye abhaisilaeli mu shilozu kushilila kwa Moose. Bhaazya uMoose mu Wilulanyo uwa mazwi amajeni. ‡ **9:9** 9:9 Bhaazya Nkumbushizyo 25:4. § **9:9** 9:9 Ing'ombe we yikukhanya ingano kupukusula insanga, utayipinyaje kwi lomu ABhaisilaeli bhakhapukusulilaga ingano ing'ombe.

akusiibha izyi ng'ombe nyeene? ¹⁰ Bheli, atakhatasibhililaga twetwe we akhalongaga ziniizyo? She zili! Uwusimbe wunauwo wasimbiilwe kunongwa yitu! Kunongwa ye we akulima, na we akusezya, bhonti bhabhili bhakhondeeye kusubhila kuposheela iviyabho. ¹¹ Itwe twalumbiliye iNtumi iNyinza kukwinyu, anzu muntu we akawaala imbeyu. Bheli, likubha lizwi lipiti kuposheela ivintu vwinyu kutwawwa anzu muntu we akuvuna? ¹² Inga bhamu bhakhondeeye kuposheela ivintu viniivwo kufuma kukwinyu, bheli, itwe tutakhondeeye kushila bhanaabho?

Ileelo itwe tutisiize vwe tukhondeeye kubhombelwa niimwe, lyoli tujimbiliye mu zyonti inga tutakhabhadinde abhantu kwitikha iNtumi iNyinza izya Kilisiti. ¹³ Bheli, mutamanyile kuti bhe bhakubhomba imbombo mu Nyumba iMfinjile,* bhakulya ishaakulya shaabho kufuma mu vwe bhafumwizye pa shigemo?† Kwe kuti bhe bhakubhomba imbombo iya kufumwa imfinjile pa shigemo, bhakuposheela kufuma mu mfinjile ziniizyo. ¹⁴ Umwene uYeesu wope shiniisho alajiziize kuti bhe bhakulumbiilila iNtumi iNyinza, bhalyanje kufumilana ni mbombo yiniyo.‡

¹⁵ Ileelo ine, intabhombeeye ngalyeka mu ganaago ge inhondeeye kubhombelwa. Khabhili intakusimba ganaaga inga imbombelwe ziniizyo.

* **9:13** 9:13 INyumba iMfinjile Bhaazya mu Wilulanyo uwa mazwi amajeni. † **9:13** 9:13 Bhaazya Bhalaawi 6:16, 26. ‡ **9:14** 9:14 Bhaazya Mataayi 10:10; Luuka 10:7-8.

Kukwani ine kwashi kufwa na kuti umuntu wowonti andinde kuyibaada kwani kunuuku. ¹⁶ Kunongwa ye we inkulumbiilila iNtumi iNyinza, intakhondeeye kuyibaada, kunongwa ye uMlungu andajiziizeye kuti indumbililaje. Khabhili insheleeye inga intalumbiilila iNtumi iNyinza! ¹⁷ Inga nabhombaga imbombo yiniini ku shigane shaani, nhani nasubhiye kuposheela, ileelo ishi inkubhomba kunongwa ye inkwanziwa kuyibhomba. Kwe kuti imbombo ini inkuyibhomba ku shigane sha Mulungu. ¹⁸ Ishi inhayiposheela khantu khooni? Kuposheela kwani kwe ku kuuku: kulumbiilila iNtumi iNyinza sita kuposheela, awe sita kwisya vwe inhondeeye kuposheela kunongwa iya kulumbiilila.

Zye abhasundikwa bhakhondeeye kubhomba

¹⁹ She poope ne musatulwe, khabhili te ne mutumwa wa muntu wowonti, injibhiishile kubha ne mutumwa wa bhantu bhonti, inga imbajeeleze abhantu abhinji bhamwitishe uKilisiti. ²⁰ Ku Bhayahuudi, namile ngati ne Muyahuudi, inga imbajeeleze aBhayahuudi bhamwitishe uKilisiti. Kwe kuti ku bhaala bhe bhakulandata indajizyo zya Moose, namile ngati ne mulandati wi ndajizyo, poope she ine intamile ne mutumwa wi ndajizyo, inga imbajeeleze bhe bhakulandata indajizyo bhamwitishe uKilisiti. ²¹ Ku bhe bhatazimanyile indajizyo, namile ngati muntu we atazimanyile indajizyo inga imbajeeleze bhamwitishe uKilisiti. Te kuti inkwikhala sita kulandata indajizyo zya Mulungu, ndaali, inkuzilandata

kunongwa ye inkulongolwa ni ndajizyo zya Kilisiti. ²² Ku bhe bhatagomile mu lwitikho, naamile ngati muntu we atagomile mu lwitikho, inga imbasejeeleze bhamwitishe uKilisiti. Nabhombile zyonti ku bhantu bhonti, inga imbaposhe bhamu. ²³ Inkabhomba ganaaga gonti kunongwa yi Ntumi iNyinza inga insangaanile na bhanji insayo zyakwe.

²⁴ Mutamanyile kuti abhantu bhe bhakufuuyana kushimbila, bhonti bhakushimbila, ileelo weeka mwene we akuposheela ishipambwi isha kufuuya? Pe shiniisho mushimbilaje nhaani mu mafuuyano inga nimwe mukhaposheele ishipambwi. ²⁵ Bhe bhakufuuyana mu mafuuyano, bhakabhomba ku makha kuyilubhizya kulingaanya amabhili gaabho kunongwa iya kufuuyana. Bhakabhomba ziniizyo inga baposheele ishipambwi isha khabhalilo khashe bhulo. Ileelo itwe tukuyilubhizya inga tukhaposheele ishipambwi isha wiila na wiila. ²⁶ Pe shiniisho, niine intakushimbila ngati muntu we akushimbila sita lubhaatikho, kabhili intakulwa ngati muntu we akusamba inguumu kukhoma impepu. ²⁷ Lyoli inkuwuyimvwa na kuwulubhizya umabhili waani kujimbiilila inga we nalumbiilila abhantu abhanji iNtumi iNyinza, ine uMulongu atakhanhaane.

10

Insoshi ku zya vifwani ivwa bhamulongu

¹ Bhanholo bhaani mu lwitikho, inkwanza mukumbushe kuti abhamaama bhitu bhonti we

bhakashila mu shilozu, bhonti bhálongoliilwe ni bhingo,* khabhili bhonti bháshilile pakaasi pa sũmbi. ² We bhalongolwa ni bhingo na kushila mwa sũmbi, yáamile ngati bhózeliilwe kubha bhalandati bha Moose.† ³ Bhonti bháliiye ishaakulya shishiila she sháfumile kũmwanya.‡ ⁴ Khabhili bhonti bhámweleeye aminzi gaala ge uMũlungu ábhapiiye kwi dala ilya mayele, kufuma mwi lyalaawe. Ilyalaawe liniilyo áamile wu Kilisiti we akhajendaga peeka nabho. ⁵ Ileelo abhinji mu bhanaabho, bhakhabhombaga zye zitakũmũkhondezya uMũlungu. Pe akhabhayazyá, amavimba gaabho gásaatile mu shilozu.

⁶ Shiniisho, ziniizyo zyáfumiiye kubha shikholanyo kũkwitũ. Zikutusokha kuti tũtasũngũkhaje kũbhomba imbiibhi anza bheene she bhakhasũngũkhaga. ⁷ Mutapuutaje ivifwani vwa bhamũlungu anza bhamu mu bhanaabho she bhakhabhombaga. Anza she yisimbiilwe mu Wusimbe uWufinjile kuti, “Abhantũ bhikhaaye paasi, bhakhalya na kũmwela, pilongolela bhakhimũilila kuvina ishimbembu.”§ ⁸ Khabhili tũtabhombaje uwubhembu anza bhamu mu bhaala she bhakhabhombaga. Pe uMũlungu akhabhayazyá abhantũ ielufu amashumi gabhili na zitatũ (23,000) kwi siku lyeka.* ⁹ Khabhili tũtamũlingaje uMwene anza

* **10:1** 10:1 Bhaazyá Kufuma 13:21-22. † **10:2** 10:2 Bhaazyá Kufuma 14:22-29. ‡ **10:3** 10:3 Bhaazyá Kufuma 16:35. § **10:7** 10:7 Bhaazyá Kufuma 32:6. * **10:8** 10:8 Bhaazyá Mbaazyó 25:1-9.

bhamu she bhámulinjile kwi dala ilya kubhomba imbiibhi, bhakhalumwa ni njokha, bhakhafwa.† 10 Mutayibhunaje anza bhamu she bhakhayibhunaga, ukhabhizya umugoji akhabhayazya.‡

11 Ishi ziniizyo zyonti zye zyábhaajile abheene inga zibhe shikholanyo ku bhanji, zyasimbiilwe inga zibhe nsoshi kukwitu itwe twe tukwikhala mu nsiku izi izya kumpeleela. 12 Pe shiniisho we akuyilola kuti ayimiliye akhinza mu lwitikho, ayenyaaje inga atakhaagwe. 13 Indingo zye zibhaajile, zya mwata ku bhantu. Umulungu musunde, uweene te ayitishize mulingwe kushila amakha giinyu. Ileelo peeka ni ndingo, uweene atubhape amakha aga kujimbiilila ni dala ilya kufumila inga mubhe mu wutengaanu.

Insoshi ku zyi Shaakulya sha Mwene

14 Shiniisho bhaganwa bhaani, zishimbilaje impuuto izya vifwani vwa bhamulungu! 15 Inkulonga nimwe anza bhantu bhe bhali ni njeele, mwamulaje muneemwe izi zye inkulonga. 16 Bhali, we tukumusalifwa umulungu ku shikoopa ishi divaayi she tukumwelela mu khabhalilo akhi Shaakulya sha Mwene, tutakubha mu wupeeka mwi bhanda lya Kilisiti? Bhali, we tukumensula ikaati na kulya, tutakubha mu wupeeka mu mabhili wa Kilisiti? 17 Kwe kuti ikaati lili lyeka, itwe twe twe bhinji, tuli mabhili weeka, kunongwa ye twenti tukusanganila ikaati lyeka.

† 10:9 10:9 Bhaazya Mbaazyo 21:5-6. ‡ 10:10 10:10 Bhaazya Mbaazyo 16:41-46.

18 Bheenye abhantu abha mu Isilaeli. Bhuli, bhonti bhaala bhe bhakulya vwe bhaputiye pa shigemo, bhatakubha mu wapeeka nula we bhakumufumwizya? § 19 Ishi inkwanza kulonga lyoni? Kuti, ishaakulya she bhafumwizye ku lupuuto ulwa vifwani iwva bhamulungu shinza kushila ishaakulya she bhatafumwizye? Awe viniivwo ivifwani iwva bhamulungu khantu kha nalyoli kushila ishifwani? 20 She zitali! Imfinjile zye bhafumwizye bhe bhatakumwitikha umulungu, bhakufumwa ku masetani te kwa Mulungu. Ine intayiganile kuti imwe mubhe nu wapeeka na masetani. 21 Yitakwanziwa kuti mumwelaje mu shikooa sha Mwene, khabhili mumwelaje mu shikooa isha masetani. Mutakwanziwa kulya ishaakulya sha Mwene, khabhili mulye ishaakulya isha masetani. 22 Bhuli, tukwanza kuzumbulanya umwone wa Mwene? Bhuli tuli na makha kushila uweene?

Zye tukubhomba zimupaalaje umulungu

23 Bhamu bhakuti, "Ivintu vwonti vwitishili-ilwe." fleelo te kuti ivintu vwonti vikhondeeye. Khabhili bhakuti, "Ivintu vwonti vwitishili-ilwe." fleelo ine inkuti, te vwonti vikwavwa. 24 Umuntu atasajilaje zye zikumwavwa wuuyo, lyoli asajilaje zye zikubhaavwa abhanji.

25 Inyama zyonti zye bhakukazya mu manaalo malyanje sita kubhuzilizya-bhuzilizya, inga mutayimbaje mu nsibho zyinyu. 26 Kunongwa ye mu Wusimbe uWufinjile yisimbiilwe kuti,

§ 10:18 10:18 Bhaazya Bhalaawi 7:6-10, 14, 15.

“Insi peeka ni vintu vwonti vwe vili mumwo, vwa Mwene.”*

²⁷ Umuntu we atitishile inga akubhalanjila kulya, niimwe mwikha kubhala, ivintu vwonti vwe akubhapa, malyanje sita kubhuzilizya-bhuzilizya kuti vifumile kwoshi, inga mutayimbaje mu nsibho zinyu. ²⁸ Ileelo inga umuntu abhabhuzya kuti, “Ishaakulya ishi bhaputiye ku vifwani vwa bhamulungu,” pe mutalyanje kunongwa ya muntu wanayo we abhabhuziye, na kunongwa yi nsibho mu mooyo. ²⁹ Inkulonga te ku nsibho zinyu, lyoli inkulonga insibho zya muntu we abhabhuziye. Kwe kuti, khooni khe uwusatulwe waani wasubhile insibho zya muntu uwunji? ³⁰ Inga ine inkulya ishaakulya shiniho ku nsalifwo, khooni inkuligwa kunongwa iya vintu vwe inkumusalifwa umulungu?

³¹ Pe shoshonti she mwalya, awe kumwela, awe shoshonti ishinji she mukubhomba, vwonti viniwwo vibhombekhaje ku wumwamu wa Mulungu. ³² Mutabhapuvwaje abhayahuudi awe abhayunaani awe ishibhanza sha Mulungu. ³³ Mubhe anziine. Kunongwa ye inkulunga kubhakhondezya abhantu bhonti ku madala gonti. Intakwanza kuyikhondezya naneene, lyoli kubhakhondezya bhonti, inga bhawaaje uwuposhi.

* **10:26** 10:26 Bhaazya Zabuuli 24:1.

11

1 Shiniisho mwenyezyaje kukwani, anza she niine inkwenyezya kwa Kilisiti.

Kugubishila kwi twe mu khabhalilo akha luputo

2 Inkubhapaala kunongwa ye mukunkumbukha ku zyonti, na kulema imanyizyo zye namanyiiye na kubhamanyizya. 3 Heelo inkwanza mumanye kuti itwe lya musakhaala wowonti we ayitishile wu Kilisiti, itwe lya mwantanda malume, itwe lya Kilisiti wu Mulungu. 4 Umusakhaala wowonti we akupuuta awe kufumwa uwukuwi, kumo agubishiye kwi twe lyakwe, akumusupizya wu Kilisiti we litwe lyakwe. 5 Umwantanda wope we akupuuta awe kufumwa uwukuwi sita kupinya ishitambaala kwi twe lyakwe, akumusupizya malume we litwe lyakwe, kunongwa ye akubha ngati mwantanda we asyenguuye insisi. 6 Umwantanda we akulola uwukhata kugubishila kwi twe, pe asyengule insisi zyakwe! Heelo inga nsoni kwa mwantanda kusyengulwa insisi zyakwe, pe apinyaje ishitambaala kwi twe lyakwe. 7 Yitakhondeeye kwa musakhaala kugubishila kwi twe, kunongwa ye aweene shikholanyo sha Mulungu, kabhili akulolesya uwumwamu wa Mulungu. Heelo umwantanda wumwamu wa musakhaala. 8 Kunongwa ye umulungu atamupelile umusakhaala kufuma kwa mwantanda, lyoli amupelile umwantanda kufuma kwa musakhaala. 9 Kabhili umulungu atamupelile umusakhaala kunongwa ya

mwantanda, lyoli ámpelile umwantanda kunongwa ya musakhaala. ¹⁰ Kunongwa yiniini, na kunongwa ya bhakhabhiza bhe bhakutendeela, umwantanda akhondeeye kupinya ishitambaala kwi twe kulolesya uwaamulo we wuli pamwanya yaakwe.

¹¹ Heelo kunongwa ye tukhomanyiinywe nu Mwene, umwantanda akumusubhila umusakhaala, wope umusakhaala akumusubhila umwantanda. ¹² Anza she umwantanda apeliilwe kufuma kwa musakhaala, wope umusakhaala akupaapwa nu mwantanda. Heelo ivintu vwonti vikufuma kwa Mulungu. ¹³ Ishi mwamule muneemwe, bhuli yikhondeeye umwantanda kupuuta kwa Mulungu sita kupinya ishitambaala kwi twe? ¹⁴ Poope, amabhili giigo gakulolesya kuti umusakhaala kubha ni nsisi intali nsoni kukwakwe! ¹⁵ Heelo umwantanda kubha ni nsisi intali litogo kukwakwe.* Kunongwa ye uMulungu amupiiye umwantanda kubha ni nsisi intali inga zimugubishilaje kwi twe. ¹⁶ Heelo inga umuntu akwanza kudalinhana ku liniili, amanye kuti itwe awe ivibhanza vwa Mulungu tutali ni mwata ye mukulwila iya wulingaanu uwa musakhaala nu mwantanda.

Uvubhaatikho ulwa Shaakulya sha Mwene

¹⁷ Ishi ku ziizi zye inkwanza kubhalajiza, intakubhapaala. Kunongwa ye we mubhungaanile mutakubhomba zye nyinza,

* **11:15** 11:15 Kubha ni nsisi intali litogo kukwakwe Akhabhalilo khanaakho yáamile mwata abhantanda kakuzya insisi.

lyoli mukubhomba zye zitakwavwa.
 18 Inimvwizye kuti we mukubhangaana kupuuta ma shibhanza matakwimvwana. Ma ziniizyo zye inimvwizye inkwitikha kuti zimo zya nalyoli. 19 Kunongwa ye yikuti uwuleganu wabhe mukaasi yiinyu, inga bhe bhitishiliilwe na Mulungu bhaloleshe. 20 Nalyoli mukubhangaana, ileelo te kulya ishaakulya sha Mwene! 21 Kunongwa ye we mukulya, weeka weeka wiinyu akulya ishaakulya shaakwe sita kugulila abhamwabho. Liniilyo likubhikha amo kubha ni nzala, uwamwabho kukholwa. 22 Bheli, mutali na paliila na kumwela ma nhaaya zyinyu? Khooni khe mukushoolanya ishibhanza sha Mulungu na kubhasupizya bhe bhatali nakho naakhamu? Imbabhuzye izyoni? Bheli imbapaale ku liniili? Ndaali! Intangabhapaala.

23 Inkulonga shiniisho kunongwa ye ine naposheleeye kwa Mwene imanyizyo zye nabhalesheeye imwe, kuti uMwene uYeesu uwusiku wuula we alonjeliilwe, akheega ikaati. 24 We amusalifwa uMulungu, akhamensula ikaati akhati, "Uwu we mabhili waani we inkuwufumwa kunongwa yiinyu. Mabhombaje shiniishi kankumbukha ine." 25 We bhaalya akhabhomba shishiila, akheega ishikoopa ishi divaayi† akhati, "Ishikoopa ishi sha lufingo ulupwa‡ lwe lukubhombekha mwi bhanda lyani. We mukumwela, mabhombaje

† 11:25 11:25 Idivaayi Bhaazy mu Wilulanyo uwa mazwi amajeni. ‡ 11:25 11:25 Ulufingo ulupwa Bhaazy ulufingo mu Wilulanyo uwa mazwi amajeni.

shiniisho kunkumbukha.” ²⁶ Kunongwa ye we mukulya ikaati ili na kumwela ishikoopa ishi, mukuvwinsya kufwa kwa Mwene kufishila akhabhalilo khe akhayinza.

²⁷ Umuntu wowonti we akulya ikaati liniilyo awe kumwela ishikoopa shiniisho she yitakhondeeye, atibhe abhombile mbiibhi, kunongwa ye atibhe asholanyiinye umubhili ni bhanda lya Mwene. ²⁸ Pe shiniisho umuntu wowonti ayibhuzilizye wuuyo suuti, pe alye ikaati na kumwela ishikoopa shiniisho.

²⁹ Kunongwa ye umuntu wowonti we akulya na kumwelela sita kumanya zye zikhondeeye mu wupeeka nu mubhili wa Mwene, akuyileetela kulongwa wuuyo. ³⁰ Ye nongwa abhinji mukaasi yiinyu bhatolwe, bhamu bhabhinu, khabhili bhamu bhafuuye. ³¹ Ileelo bhanje twayibhuzilizyaga taneetwe, nhani tataamile tulongwe. ³² Poope shiniisho, we tukulongwa nu Mwene, tukusundwa inga tutakhalongwe peeka na bha mu nsi. ³³ Pe shiniisho, bhanholo bhaani mu lwitikho, we mukubhangaana kulya iShaakulya sha Mwene, mugulilanaje. ³⁴ Inga umuntu ali ni nzala, alyanje kukwakwe, inga we mukubhangaana mutakhaazyeye kulongwa. Niine we ninza inhayibhabhuzya akhinza zye zisyaliliye.

12

Ivikunjilwa vwa Mupepu uMufinjile

¹ Ishi bhanholo bhaani mu lwitikho, ku zya vikunjilwa kufuma kwa Mupepu

uMufinjile inkwanza kuti mumanye akhinza. ² Mumanyle kuti we mutámumanyile uMulungu, mwákhopeliilwe na kulongolwa kupuuta ivifwani ivwa bhamulungu bhe bhatakulonga. ³ Pe shiniisho inkwanza mumanye kuti, ataliipo umuntu we akulongolwa nu Mupepu wa Mulungu we angakhola kulonga kuti, “UYeesu agunwe.” Khabhili ataliipo umuntu we angakhola kulonga kuti, “UYeesu wu Mwene,” inga atakulongolwa nu Mupepu uMufinjile.

⁴ Kuli nu wuleganu uwa vikunjilwa, ileelo uMupepu uMufinjile we akugabhanya ali weeka. ⁵ Khabhili kuli uwuleganu uwa kumubhombela uMwene, ileelo uMwene we tukumubhombela ali weeka. ⁶ Khabhili kuli uwuleganu uwa kubhomba imbombo, ileelo uMulungu ali weeka we akubhomba imbombo zyonti ku bhantu bhonti. ⁷ Umuntu weeka weeka uMupepu uMufinjile akuumupa ishikunjilwa inga abhavwaje abhantu bhonti. ⁸ Kunongwa ye uMupepu uMufinjile akuumupa weeka izwi ilyi njeele, uwamwabho akupeelwa izwi ilya wumanyi nu Mupepu wanuayo. ⁹ UMupepu wanuayo, akuumupa weeka kubha nu lwitikho, uwamwabho akuumupa ishikunjilwa isha kuponia, ¹⁰ uwamwabho ishikunjilwa isha kubhomba amayele, uwamwabho kufumwa uwukuwi, uwamwabho kumanya uwuleganu uwa Mupepu wa Mulungu na mapepu amabhiibhi, uwamwabho kulonga indongo impwa, uwamwabho kwilulanya indongo ziniizyo. ¹¹ Ziniizyo zyonti mbombo zya Mupepu

wu wunwuyoye weeka, we akuumupa umuntu weeka weeka ishikunjilwa ishileganu anza she ayiganile wuyoye.

Umabhili weeka impaaswa inyinji

¹² She poope umabhili wuli ni mpaaswa inyinji, impaaswa ziniizyo zyonti mabhili weeka. She zili na kwa Kilisiti. ¹³ Kunongwa ye mwa Mupepu uMufinjile weeka, twenti twozeliilwe ma mabhili weeka. Tabhe twe Bhayahuudi awe twe Bhayunaani, tabhe twe bhatumwa awe tabhe twe bhasatulwe, twenti uMulungu atwitiye uMupepu uMufinjile weeka. ¹⁴ Umabhili wutali ni mpaaswa yeeka, lyoli wuli ni mpaaswa inyinji. ¹⁵ Inga ishinama shikuti, “Kunongwa ye ine te ne nyoobhe, te ne wa mabhili,” bhuli, liniilyo lingashibhikha shitabhe sha mabhili? Ndaali. ¹⁶ Lyope ikutwe inga likuti, “Kunongwa ye ine te ne lyiso, te ne lya mabhili,” bhuli, liniilyo lingalibhikha litabhe lya mabhili? ¹⁷ Inga umabhili wonti wubhanje lyiso, umuntu angakhola bhuliibhuli kwimvwa? Awe inga umabhili wonti wubhanje likutwe, umuntu angakhola bhuliibhuli kupingula? ¹⁸ Heelo anza she yili uMulungu azibhatishile impaaswa zya mabhili anza she ayiganile wuyoye. ¹⁹ Inga vwonti vibhanje mpaaswa yeeka, umabhili nhani wuli pooshi? ²⁰ Heelo ishi impaaswa nyinji, lyoli umabhili wuli weeka.

²¹ Ilyiso litangayibhuzya inyoobhe kuti, “Intakukwanza.” Lyope itwe litangavibhuzya ivinama kuti, “Intakubhanza.” ²² Lyoli impaaswa zye zikulolekha kuti ndeganu,

zye zikwanziwa nhaani. ²³ Khabhili impaaswa zye zikulolekha kuti zitali nu lushindikho, zye tukuzishindikha. Zyope impaaswa zye zikulolekha kuti te nyinza, zye tukuzisunga nhaani, ²⁴ ileelo impaaswa izyi togo, zitakwanziwa kuzisunga nhaani. $\text{\textcircled{M}}$ Mulungu azibhiishile peeka impaaswa, khabhili azipiye ulushindikho nhaani zye zitali nu lushindikho. ²⁵ Abhobile shiniisho, inga kutabhe kugabhunhana mu mubhili, lyoli impaaswa zyonti zyavwanaje ku wulingaanu, sheeka sheeka ku shamwabho. ²⁶ Inga impaaswa yeeka yavwalala, zyonti zikuvwalala peeka nayo. Khabhili impaaswa yeeka inga yabha nu lushindikho, zyonti zikubha nu luseshelo peeka nayo.

²⁷ Ishi, imwe mwe mubhili wa Kilisiti, weeka weeka wiinyu mpaaswa mu mubhili wunuuwo. ²⁸ $\text{\textcircled{M}}$ Mulungu abhiishile mu shibhanza abha kwanda, bhasundikwa, abha wubhili bhakuwi, abha wutatu bhamanyizi, na bhe bhakubhomba amayeke, bhe bhali ni vikunjilwa ivwa kuponja, bhe bhali ni vikunjilwa ivwa kwavwana, bhe bhali ni vikunjilwa ivwa kulongozya, na bhe bhali ni vikunjilwa ivwa kulonga indongo impwa. ²⁹ Bhali, bhonti bhasundikwa? Bhonti bhakuwi? Bhonti bhamanyizi? Bhonti bhakubhomba amayeke? ³⁰ Bhonti bhali ni vikunjilwa ivwa kuponja? Bhonti bhakulonga indongo impwa? Bhali, bhonti bhakwilulanya indongo ziniizyo? Ndaali! ³¹ Ishi muyikungule kwanza ivikunjilwa ivipiti. Khabhili intibhalanje idala lye linya

nhaani kushila ziniizyo zyonti.

13

Ulugano

¹ Poope ingalonga ku ndongo izya bhantu ni zya bhakhabhizya, ileelo inga intali nu lugano, inkubha ngati shongo shi debe lye litali na khantu awe ishongo ishi jomvu. ² Khabhili poope inga inkufumwa uwukuwi na kuziyaganya zyonti zye zili kukwilu nu wumanyi wonti, poope ingabha nu lwitikho ulupiti ulwa kusaamwa amagamba, ileelo inga intali nu lugano, yitakwavwa naakhamu. ³ Khabhili inga naafumwa ishuma shaani shonti kubhapa abhapiina, khabhili inga naafumwa umubhili waani kuti wupwe mu mwoto, inga intali nu lugano, intakukhaaga naakhamu.

⁴ Ulugano lukujimbiilila, ulugano lukwavwa, ulugano lutali nu mwone, ulugano lutali na mabaado, khabhili lutali na maluli. ⁵ Ulugano luli nu wusunde, ulugano lutakwanza kuyikhondezya, lutakuvitwa nalubhilo, khabhili ulugano lutakubhaazya imbiibhi. ⁶ Ulugano lutakuseshela imbiibhi, lyoli lukuseshela uwanalyoli. ⁷ Ulugano lukujimbiilila zyonti, lukwitikha izya Mulungu akhabhalilo khonti, lukusubhila zyonti, khabhili lukuyisinda ku zyonti. ⁸ Ulugano lutakusila naalumo. Ileelo ivikunjilwa ivinji vikhayisila, anza kufumwa uwukuwi, na kulonga indongo impwa, nu wumanyi. ⁹ Kunongwa ye tumanyile mashe, khabhili tukufumwa uwukuwi wushe.

10 fleelo we winza uwukwilanu, gaala ge gali mashe gakhayisila. 11 We ne mwana, inhalongaga anzũ mwana, inhasiibhaga anzũ mwana, inhamanyaga anzũ mwana. fleelo ishi kũnongwa ye ne muntu Ʃmũsongo, izya shaana inzileshile. 12 Kũnongwa ye ishi tukulola ishifwani anzi sha mũ shilolelo, ileelo mũ khabhalilo khaala tukhayilola apazelu. Akhabhalilo ikha imanyile mashe, akhabhalilo khaala inhayimanya akhinza anza she ƩMũlungũ amanyile ine. 13 Pe shiniisho, kũli amazwi gatatu ge te gakhaashile naalumo: ulwitikho, ulũsũubhilo nũ lugano. fleelo ipiti nhaani kũ ganaago gatatu lugano.

14

Ivikũnjilwa iwwa kulumbiilila na kulonga indongo impwa

1 Mũlongolwaje nũ lugano na kwanza nhaani ivikũnjilwa iwwa Mupepu uMufinjile, inhaani ishikũnjilwa isha kufumwa uwukuwi. 2 Kũnongwa ye umuntu we akũlonga indongo impwa, atakũlonga na bhantu, lyoli akũlonga nũ Mũlungũ, kũnongwa ye ataliipo we akũzyaganya zye akũlonga. Umuntu wũnũyo akũlonga izya kukwilu mũ mwoyo waakwe.* 3 fleelo we akufumwa uwukuwi, akũlonga na bhantu amazwi aga kubhagomwa mũ lwitikho, aga kubhakhobhosya na kubhajinjizya Ʃmwoyo.

* 14:2 14:2 Akũlonga izya kukwilu mũ mwoyo waakwe Bhamu bhilulanyiinye bhatili, atakũlonga kũ makha ga Mupepu intumi zye zili kukwilu.

4 We akulonga indongo impwa, akuyigomwa wuuyo mu lwitikho lwakwe, ileelo we akufumwa uwukuwi akugomwa ishibhanza.

5 Ine inkwanza imwe mweni mulongaje indongo impwa, inhaani inkwanza mufumwaje uwukuwi. Kunongwa ye umuntu we akufumwa uwukuwi mupiti kushila we akulonga indongo impwa. Lyoli inga aliipo umuntu we akwilulanya zye akulonga, ishibhanza shikukula mu lwitikho. 6 Ishi bhanholo bhaani mu lwitikho, inga ninza kukwinyu na kalonga indongo impwa, intibhaavwe akhooni? Intangabhaavwa naakhamu. Lyoli inga nabhaleetela zye uMlungu aniguliye, awe uwumanyi, awe uwukuwi kufuma kwa Mlungu, awe imanyizyo zimo panaapo pe ingabhaavwa. 7 Poope ivintu vwe vitali nu wuumi, anzi mfwilimbo, awe ishinanda, we vikukuta, bhuli, umuntu angalumanya bhulibhuli ulwimbo lwe lukwimbwa inga kutali nu wuleganu uwa mazi? 8 Inga ikakaavu likukuta izi lye litakumanyisa ku bhantu, wu naanu we angayilinganya kulwa ibho? 9 She zili na kukwinyu, inga ulumili lwinyu lukulonga zye zitakumanyikha, wu naanu we angazyaganya zye mukulonga? Amazwi giinyu gatiteje mu mpepu.

10 Mu nsi muli indongo inyinji, ileelo yitaliipo ngayeeka ye yitakumanyikha. 11 Shiniisho inga intakuyaaganya indongo ye akulonga umuntu umo, inkubha ne mujeni kukwakwe, wope akubha mujeni kukwani. 12 Shiniisho niimwe, kunongwa ye mukwanza nhaani

kubha ni vikunjilwa ivwa Mupepu uMufinjile, mayikungule nhaani kubha ni vikunjilwa vwe vikukuzya ishibhanza.

¹³ Pe shiniisho, umuntu we akulonga indongo impwa, amulaabhe uMulongu aamupe uwu-manyi uwa kwilulanya. ¹⁴ Kunongwa ye inga napuuta ku ndongo impwa, umwoyo waani we wukupuuta, ileelo injeele yaani yitakupata naakhamu. ¹⁵ Imbombe lyoni? Intipuutaje mu mwoyo waani, khabhili intipuutaje ku njeele zyani. Intiyimbe mu mwoyo waani khabhili intiyimbe ku njeele zyani. ¹⁶ Inga ukumusalifwa uMulongu ku mwoyo waakho, umuntu we atakuziyaganya zye ukulonga, inga ali pa lubhangaano, angakhola bhuliibhuli kwitishila impuuto zyakho izya kusalifwa kuti, “Zibhe shiniisho”? ¹⁷ Kukwakho impuuto izya kumusalifwa uMulongu zikubha nyinza, ileelo kwa muntu uwunji zitangamugomwa mu lwitikho. ¹⁸ Inkumusalifwa uMulongu kunongwa ye ine inkulonga ku ndongo impwa kubhashila mweni. ¹⁹ Ileelo mu shibhanza inkuyigana nhaani kulonga amazwi gasaanu ge gakumanyikha ku njeele inga imbamanyizye abhanji, na kuti indonje amazwi ielufu ishumi mu ndongo impwa.

²⁰ Bhanholo bhaani mu lwitikho, mutasiibhaje anza bhaana, ileelo kusiibha kwinyu mabhe anza bhantu bhe bhagomile. Lyoli ku zyi mbiibhi, kwashi mabhe anza bhaana abheela. ²¹ Yisimbiilwe mu Wusimbe uWufinjile kuti, “UMwene akulonga akuti, ‘Inhayilonga na bhantu ibha

kushilila ku bhantu abhi ndongo iyinji,
na ku malomu ga bhantu abhajeni,
poope shiniisho te bhakhantejeelezye.' "†

²² Pe shiniisho, kulonga ku ndongo impwa shiholesyo, te ku bhe bhitishile lyoli ku bhe bhatitishile. Heelo kufumwa uwukuwi shiholesyo te ku bhe bhatitishile, lyoli ku bhe bhitishile. ²³ Ishi inga bhe bhitishile bhabhungaanile kupuuta mu shibhanza, bhonti bhande kulonga indongo impwa, ileelo inga bhinjila abhantu abhajeni, awe bhe bhatitishile, bhuli bhatangati mali ni shilaalusi? ²⁴ Heelo inga mweni mukufumwa uwukuwi, ayinjila umuntu we mujeni, awe we atitishile, zyonti zye akwimvwa zitimwavwe kumanya imbiibhi zyakwe. Khabhili zyonti zye ayimvwa zitimlonje. ²⁵ Zye zili mu mwoyo waakwe, zikubha apazelu. Pe atisugamile na kumupuuta uMulongu kati, "Nalyoli uMulongu ali peeka niimwe!"

Uubhaatikho ulwa Bhakilisiti kupuuta

²⁶ Bhanholo bhaani mu lwikho, tulonge tati bhuli? We mubhungaanile peeka, umo akwimba ulwimbo, uwamwabho akumanyizya, uwamwabho akwilulanya, uwamwabho akulonga indongo impwa, uwamwabho akwilulanya zye zikulongwa. Ziniizyo zyonti zibhombekhaje kukuzya ishishanza. ²⁷ Inga bhaliipo bhe bhakulonga indongo impwa, bhalongaje bhabhili awe bhatatu, bhatakhonjele, khabhili bhalongaje weeka weeka, ileelo abhanje umuntu uwa kwilulanya zye bhakulonga.

† 14:21 14:21 Bhaazya Yeesaya 28:11-12.

28 Heelo inga ataliipo uwa kwilulanya, we akulonga indongo impwa aleshe kulonga pa shibhanza, lyoli alongaje mu mwoyo waakwe nu Mulungu.

29 Bhoope bhe bhakufumwa uwukuwi, bhafumwaje bhabhili awe bhatatu, bhamu bhasimishizyaje amazwi ganaago. 30 Inga weeka mu bhe bhakutejeelezya lyamwinzila izwi ilya kulonga kufuma kwa Mulungu, we akulumbiilila apume. 31 Kwi dala liniilyo imwe mwenti mangakhola kufumwa uwukuwi kwi dala ilya kuposhelezanya, inga mwenti manyile na kugoma. 32 Kunongwa ye ishikunjilwa isha wukuwi, shikutabhaalwa na bhe bhakufumwa uwukuwi. 33 Umulungu witu te wa muyubhano, lyoli wa wutengaanu.

Anza she zili mu vibhanza vwonti iwva bhafinjile bha Mulungu, 34 abhantanda bhapumaje nye mu shibhanza. Kunongwa ye bhatakwitishilwa kulonga, lyoli bhatinikhaje anza she yikulonga indajizyo ya Moose. 35 Inga bhakwanza kubhuzilizya limo, bhabhabhuzilizyaje abhalume bhaabho mu nyumba, kunongwa ye zyi nsoni umwantanda kulonga mu shibhanza. 36 Bhuli, izwi lya Mulungu lyafumile kukwinyu, awe mwemwe mubheene mwe izwi libhafishiiye? 37 Inga umuntu akuyilola kuti ali ni shikunjilwa isha wukuwi, awe ali ni vikunjilwa iwamwabho iwva Mupepu uMufinjile, pe ayitithe kuti zye inkubhasimbila ndajizyo kufuma kwa Mwene uYeesu. 38 Heelo inga umuntu we akushoolanya ganaaga, wope bhamusholanyaaje.

39 Pe shiniisho bhanholo bhaani mu lwitikho, mwanzaje nhaani kufumwa uwukuwi, ileelo matamakhaanaje umuntu kulonga indongo impwa. 40 Ieelo zyonti ziniizi zibhombekhaje ku winza, khabhili ku lubhaatikho.

15

Kuzukha kwa Kilisiti

1 Ishi bhanholo bhaani mu lwitikho, inkubhakumbusya intumi inyinza zye nabhalumbiliye, nimwe mukhaziposheela, ishi zye zikubhabhikha kubha nu lwitikho lwe mali nalwo. 2 Ku Ntumi inyinza ziniizi mukawaaga uwuposhi inga mukulema ku wusimishizu izwi liniilyo lye nalumbiliye. Lyoli inga mutakulema, ulwitikho lwinyu lutakwavwa.

3 Ine nabhamanyiziizye imanyizyo impiti zye naposheleeye, kuti ukilisiti afuuye kunongwa yi mbiibhi zitu, anza she uWusimbe uWufinjile wakulonga.* 4 Khabhili yisimbiilwe mu Wusimbe uWufinjile kuti akhasyilwa, isiku ilya wutatukhazyukha.† 5 Akhayi lolesya kwa Keefa, iwinda akhayi lolesya ku bhasundikwa bhaakwe ishumi na bhabhili. 6 Pilongolela, akhayi lolesya ku bhanholo mu lwitikho imia zisaanu (500) bhe bhamaile peka. Abhinji mu bhanaabho nu musanyuunu bhumi, she poope bhamu bhakhafwa. 7 Pilongolela, akhayi lolesya kwa Yaakobo, iwinda akhayi lolesya ku bhasundikwa bhonti. 8 Kuwumalilishilo we ayi lolesya ku

* 15:3 15:3 Bhaazya Yeesaya 53:5-12. † 15:4 15:4 Bhaazya Zabuuli 16:8-10.

bhonti, akhayilolesya kukwani, ine ne ngati nápapiilwe we akhabhalilo khashiili kufikha. ⁹ Kunongwa ye ine ne muni mu bhasundikwa, ne intakhondeeye poope kubhilishilwa kuti musundikwa, kunongwa ye náshiyimvwizye ishibhanza sha Mlungu. ¹⁰ Heelo ku wiila wa Mlungu, indi shiniishi she indi. Uwiila waakwe kukwani wutáamile wa khasa. Lyoli nábhombile imbombo kushila abhasundikwa bhonti. Intáamile neene, lyoli wáamile wiila wa Mlungu we wáamile peeka niine. ¹¹ Shiniisho imbe neene inkulumbiilila, awe abhasundikwa abhanji, shiniisho she tukulumbiilila intumi, na she mwitishile.

Kuzyukha ku bhafwe

¹² Ishi inga uKilisiti akulumbiililwa kuti ázyushile kufuma ku bhafwe, bhuliibhuli bhamu mukaasi yiinyu bhakuti kutaliipo kuzyukha abhafwe? ¹³ Inga kutaliipo kuzyukha abhafwe, pe uKilisiti wope atázyushile. ¹⁴ Khabhili inga uKilisiti atázyushile kufuma ku bhafwe, kulumbiilila kwitu kwa khasa, lwope ulwitikho lwinyu lutakwavwa. ¹⁵ Peeka na shiniisho, itwe tukulolekha kuti twe bhakeeti bhi lenga abha Mlungu, kunongwa ye tukusimishizya kuti uMlungu ámuzyusiize uKilisiti kufuma ku bhafwe. Heelo liniilyo litangabha lya nalyoli inga abhafwe bhatakuzukha. ¹⁶ Kwe kuti inga abhafwe bhatakuzukha, wope uKilisiti atázyushile. ¹⁷ Khabhili inga uKilisiti atázyushile, ulwitikho lwinyu lutibhe lwa khasa, lyoli matibhe she mali mu mbiibhi zinyu.

18 Bhoope bhe bhafuuye we bhamwitishile uKilisiti, bhateejile. 19 Inga ulusubhilo lwitu kwa Kilisiti luli kunongwa iya wiikhalo uwa shiishi weene, ipo tukubha twe bhapiina kushila abhantu bhonti.

20 Heelo uwanalyoli we wu wuwu: uKilisiti azyushile kufuma ku bhafwe, uweene we wa kwanda kuzuyukha ku bhe bhafuuye. 21 Kwe kuti anza she uwufwe winzile kufumilana nu muntu weeka, shiniisho kwope kuzuyukha ku bhafwe kwinzile kufumilana nu muntu weeka. 22 Kunongwa ye anza she abhantu bhonti bhakufwa kufumilana nu Adamu, shiniisho abhantu bhonti bhakhayizuyukha kufumilana nu Kilisiti. 23 Heelo weeka weeka uMulungu akhayimuzuyusa ku khabhalilo khaakwe khe abhiishile. UKilisiti we atalile kuzuyukha, pilongolela bhakhayizuyukha abhantu bhaakwe akhabhalilo khe akhayinza. 24 Ipo pe uwumalilishilo wukhayinza, pe uKilisiti akhayimupa uMulungu uTaata uwumwene waakwe, we aayaza uwumwene wonti na makha gonti na bha waamulo bhonti. 25 Kunongwa ye shigane sha Mulungu kuti uKilisiti atabhaale paka abhatole abhalugu bhaakwe na kubhabhikha paasi pa waamulo waakwe. ‡ 26 Umulugu uwa kuwumalilishilo kumuyazya wufwe. 27 Kunongwa ye uWusimbe uWufinjile wakuti, “Akhayivibhikha ivintu vwonti paasi pa waamulo waakwe.” Heelo

‡ 15:25 15:25 Kubhabhikha paasi pa waamulo waakwe Mu ndongo iya Shiyunaani yikuti kubhabhikha paasi pa vinama vwakwe. § 15:25 15:25 Bhaazya Zabuuli 110:1.

uWusimbe we wukulonga shiniisho, te kuti uMulongu woope akhayibha paasi pa waamulo wanuwuwo, kunongwa ye uweene we avibhiishile vwonti paasi pa waamulo wa Yeesu.* 28 We akhayivibhiikha ivintu vwonti paasi pa waamulo wa Kilisiti, pe woope umwana akhayibha paasi pa waamulo wa Mulungu we avibhiishile ivintu vwonti paasi pa waamulo wa Mwana waakwe,† inga uMulongu abhe Mupiti wa vwonti.

29 Khabhili abhantu bhe bhakwozelwa kunongwa iya bhafwe bhakusubhila khantu khooni? Inga abhafwe bhatakuzyukha, khooni khe abhantu bhakwozelwa kunongwa ya bhafwe?‡ 30 Nitwe khooni tukuyibhiikha insiku zyonti mu khabhalilo akhabhiibhi nhaani? 31 Bhanholo bhaani, uwufwe wuli papiipi niine insiku zyonti. Liniili lye likumbiikha kuti injibaade kunongwa yiinyu kwi dala ilya kupatinhanywa nu Yeesu Kilisiti uMwene wiitu. 32 Inga insiibho yaani yibhanje ya mu nsi, kulwa kwani ni vikhanu ivikhali mu Efeeso kwamile kunaavwe akhooni? Inga abhafwe bhatakuzyukha,

“Pe tulyanje, tumwelaje,
kunongwa ye indaabhi tukhayifwa.”§

* 15:27 15:27 Bhaazya Zabuuli 8:6. † 15:28 15:28 uMwana waakwe Bhaazya uMwana wa Mulungu mu Wilulanyo uwa mazwi amajeni. ‡ 15:29 15:29 Abhantu bhakwozelwa kunongwa ya bhafwe Akhabhalilo khe lyasimbiilwe ikalaata ili, kwamile ni mwata iya Mukilisiti kwozelwa kunongwa ya wamwabho we afuuye sita kwozelwa. § 15:32 15:32 Bhaazya Yeesaya 22:13; 56:12.

33 Mutakhakhopelwe na bhantũ bhe bhakulonga shiniisho, kunongwa ye “Uwumanyani na bhantũ abhabhi-ibhi, wukunanganya injendo inyinza.”

34 Muzibhombelaje injeele anza she yikwanziwa, mutakhasheele kubhomba imbiibhi, kunongwa ye bhamu mukaasi yiinyu bhatamumanyile uMulungu. Inkulonga ziniizyo inga imbasuupizye.

Umabhili she wukhayibha isiku ilya kuzyukha

35 Heelo umuntu angakhola kubhuzilizya kuti, “Abhafwe bhakuzyukha bhuliibhali? Bhakhayibha nu mabhili we wuli bhuliibhali?”

36 Imwe mabhalema! We mwawaala imbeyu, yitangamela sita kufwa. 37 Vwe mukawaala

mbeyu, yibhe ngano awe imbeyu izinji, yitakukholana ni shimela she shikukula.

38 Heelo uMulungu akuuyipa imbeyu ishimela she akwanza wuuyo, imbeyu yeeka yeeka akuuyipa ishimela shaakwe.

39 Amabhili ga vipelwa vwonti gatali ishikholo sheeka. Abhantũ bhali na mabhili ishikholo sheeka, ivikhanu vili na mabhili ishikholo ishileganu. Zoye inyonyi ni nswi zili na mabhili ishikholo ishileganu. 40 Khabhili galiipo am-

abhili aga kamwanya na mabhili aga mu nsi. Heelo uwinza uwa mabhili aga kamwanya wunji, nu winza uwa mabhili aga mu nsi wunji.

41 Izubha lili nu winza we wuyikholile, umwezi wuli nu winza we wuyikholile ni nzota zili nu winza we wuyikholile. Zoye inzota, yeeka yeeka yili nu winza we wuyikholile.

42 She zili ku zya kuzyukha abhafwe. Anzi mbeyu, umubhili we wakusyilwa mu lusuuto wakubhola, ileelo wuula we uMulungu akhayiwuziyasya wutakubhola. 43 Umubhili wakusyilwa kwi dala ilya kuwushoolanya, ileelo uMulungu akuwuziyasya ku wumwamu. Umubhili wakusyilwa ku wutolwe, ileelo uMulungu akuwuziyasya wakubha wa makha. 44 Umubhili we wakusyilwa wa mu nsi, ileelo we uMulungu akuwuziyasya wakubha mubhili we wukulongolwa nu Mupepu uMufinjile. Kali nu mubhili uwa mu nsi, kukhayibha nu mubhili we wukulongolwa nu Mupepu uMufinjile.

45 Yisimbiilwe mu Wusimbe uWufinjile kuti, "Umuntu uwa kwanda uAdamu, apeliilwe, akhabha muntu umwumi."* Ileelo uAdamu uwa kuwamalilishilo Mupepu we akubhapa abhantu uwuumi. 46 Umubhili uwa kuwandilo we mubhili wa mu nsi, pilongolela wakwinza umubhili we wukulongolwa nu Mupepu uMufinjile. 47 Umuntu uwa kwanda afumile mu nsi, apeliilwe kufuma mu lusuuto, umuntu uwa wubhili afumile kamwanya. 48 Anza she tukholi-ine nu Adamu uwa mu nsi, she tukhayikholana nu Adamu uwa kamwanya. 49 Anza she tukholi-ine na we apeliilwe kufuma mu lusuuto, she tukhayikholana na we afumile kamwanya.

50 Bhanholo bhaani mu lwitikho, inkulonga inkuti, umubhili ni bhanda vitangakhola kwinjila mu wumwene wa Mulungu. Khe khakubhola khatangakhola kubha nu

* 15:45 15:45 Bhaazya Wandilo 2:7.

wuumi uwa wiila na wiila. ⁵¹ Tejeelezyi, inkubhabhuuzya izya kukwilu: itwe twenti te takhaafwe, lyoli twenti uMulungu akhayitugalulanya. ⁵² Nalubhilo kusinziila na kudaamula, ikakaavu ilya kumpeleela we lyakuta, abhafwe bhakhayizyukha na mabhili ge gatakubhola, niitwe uMulungu akhayitugalulanya. ⁵³ Kunongwa ye umabhili uwu we wukubhola yikuti wugalunhane wabhe mabhili we wutakubhola, wope umabhili we wukufwa yikuti wugalunhane kubha mabhili we wutakufwa. ⁵⁴ Pe umabhili uwu we wukubhola inga wagalunhana kubha mabhili we wutakubhola, wope umabhili we wukufwa inga wagalunhana kubha mabhili we wutakufwa, pe likhayikwila izwi lye lisimbiilwe mu Wusimbe uWufinjile kuti, “Uwufwe waatolwa nziila!”†

⁵⁵ “Iwe wufwe, kuli kwoshi kutola kwakho? Gali kwoshi amakha gaakho aga mavune?”‡

⁵⁶ Imbiibhi zye zikuleeta amavune aga wufwe, khabhili indajizyo zye zikutulanga amakha agi mbiibhi. ⁵⁷ Ileelo tumusalifwaje uMulungu we akuutupa kutola kwi dala ilya Mwene wiitu uYeesu Kilisiti.

⁵⁸ Pe shiniisho bhanholo bhaani abhaganwa mu lwitikho, muyisinde, mutayingaanaje. Mujendeelele kuyikungula kubhomba imbombo ya Mwene, kunongwa ye mumanyile kuti, imbombo yiinyu te ya khasa mwa Mwene.

† 15:54 15:54 Bhaazya Yeesaya 25:8. ‡ 15:55 15:55 Bhaazya Hoseeya 13:14.

16

Insaangu iya kubhaavwa aBhakilisiti

¹ Ishi, kunongwa iyi nsaangu iya kubhaavwa abhantu bha Mulungu, mubhombaje anza she navelajiziize ivibhanza ivwa mu Galatiya.

² Isiku iya Pamulungu, umuntu weeka weeka mukaasi yiinyu agabhulaje inhela kulandatana na she apatile, inga we ninza kukwinyu, kutakhabhe ni mbombo iya kusangulizya.

³ We ninza kukwinyu, inhayibhasonteelezya na makalaata aga kubhamanyisya bhaala bhe mukhayibhasebha mukaasi yiinyu kuti bhatwale insaangu zyinyu ku Yelusaleemu.

⁴ Inga yalolekha kuti niine imbale, ipo pe bhakhayishuula peeka niine.

Uhubhaatikho lwa Paulo kubhala ku Kolinso

⁵ We nashilila ku Makedoniya, inhayinza kukwinyu, kwe kuti inkusuubhila kushilila ku Makedoniya. ⁶ Pamu inhayikhala kukwinyu akhabhalilo khashe, awe lumo inhayikhala peeka niimwe akhabhalilo khonti akhi mpepu inga mukhamfumwizye ivintu ivwa kunaavwa, injendeelele kushuula kwonti kwe inkubhala.

⁷ Kunongwa ye intayiganile kakhomaana niimwe akhabhalilo khashe na kujendelela kushuula. Inga uMwene ayigana, inkusuubhila kwikhala kukwinyu akhabhalilo akhatali.

⁸ Heelo intiyikhale mu nhaaya ini iya mu Efeeso paka kufikha pi siku ilyi Pentekoositi.

⁹ Kunongwa ye uMulungu aniguliiye umulyango uwa kubhomba imbombo impiti mu nhaaya

ini, ileelo bhaliipo abhantu abhinji bhe bhakundindanjila.

¹⁰ UTiimoti inga ayinza kukwinyu, mukhamuposheelaje ayikhalaje akhinza sita lyoga, kunongwa ye woope akubhomba imbombo ya Mwene anziine she inkubhomba.

¹¹ Pe shiniisho, umuntu wowonti atakhamushoolanye. Lyoli mukhamwawwe ajendeelele kushuula ku wutengaanu, inga agalushe kukwani. Kunongwa ye ine inkumugulila peeka na bhamwitu bhe bhitishile.

¹² Ieelo ku zya nholo wiitu mu lwitikho uApoolo, imulambile nhaani kuti ayinze kukwinyu peeka na bhe bhitishile abhamwabho. Ieelo uweene atayiganile kwinda akhabhalilo ikha, lyoli akhayinza we abha na khabhalilo.

Amazwi aga kummalilishilo peeka ni ndajilo

¹³ Mubhe amiiso, muyisindaje mu lwitikho, khabhili mubhanje mwe bhadandamazu na kubha na makha. ¹⁴ Zyonti zye mukubhomba, mubhombaje mu lugano.

¹⁵ Imwe mumanyile kuti uSiteefana peeka na bhantu abha mu nyumba yaakwe, bhantu bhe bháamile bha kwanda kumwitikha uYeesu Kilisiti mu mukoa uwa Akaaya. Khabhili bhayifumwizye kubhaavwa abhafinjile bha Mulungu. Ishi bhanholo bhaani mu lwitikho inkubhalamba, ¹⁶ mubhatinikhaje abhantu anza bhanaabho, na wowonti we akuyifumwa na kuyimba kubhomba imbombo peeka nabho.

¹⁷ Inkuseshela nhaani we inkulola kuti uSiteefana, uFilitunaato, nu Akayiko,

bhinzile, bhambombeeye inyinji zye mutangabhomba kunongwa ye mutali peeka niine. ¹⁸ Bhanjinjiziize umwoyo waani, na mooyo giinyu. Mubhakumbukhaje nhaani abhantu anza bhanaabho.

¹⁹ Iyibhanza vwonti iwawa mu mukoa uwa Asiya vikubhalamukha. Uakiila nu Pulisika, peeka ni shibhanza shonti she shikukhomaana mu nyumba yaabho, bhakubhalamukha kwi taawa lya Mwene. ²⁰ Abhanholo bhonti mu lwitikho abha piipa, bhakubhalamukha. Mulamunhanaje ku lugano ulwa nalyoli.

²¹ Ine nupaulo, inkusimba indamukho izi ni nyooobe yaani naneene. ²² Umuntu wowonti we atamuganile uMwene, agunwe. Mwene wiitu uyinze!

²³ Uwiila wa Mwene uYeesu wubhe peeka niimwe. ²⁴ Ulugano lwani lubhe kukwinyu, imwe mwe mupatinhiine nu Yeesu Kilisiti.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3aa8e7a3-f258-5182-ab3f-fbc6f725bb06